

**ASO LULU, 24 IUNI 2020**

*Na nofoia e le Fofoga Fetalai le Nofoa i le itula e 9:10 i le taeao.*

Tatalo.

**FOFOGA FETALAI:** Ou te faasila sila atu ua toe amatalia Taualumaga ma Galuega a le Fono Aoao Faitulafono.

Ia, ou te faatalofa atu ma le agaga faaaloalo i le paia o le Palemene i le afio o lau Afioga i le Palemia ma le mamalu i le Kabeneta, e faapea foi sui usufono filifilia o le atunu, faapea foi le paia o le aufaigaluega a le Malo o lo o latou galalue e atiae Samoa e ala i Ofisa Sili o Pulega o Matagaluega ma Faalapotopotoga a le Malo.

**TULAFONO TAU FAAOFI O LE FAATATAUINA O TUPE (NU.3)  
2019/2020 & TULAFONO TAU FAAOFI O LE FAATATAUINA O  
TUPE 2020/2021**

**– felafolafoaiga faaaauau i luga o le faitauga faalua**

**FOFOGA FETALAI:** E maea le tatou Fono i le aso ananafi ua maea ona saunoa le Afioga i le Minisita o Tupe ma ua oo mai le faasologa i tali a le Malo i lau Afioga i le Minisita mo Tupe Maua. Ou te tapa ai ma le faaaloalo lau Afioga i le Minisita mo Tupe Maua e te tulai mai e te saunoa i mea sa laga e sui usufono o le Palemene.

**Afioga Hon TIALAVEA FEA LENIU TIONISIO HUNT (Minisita mo Tupe Maua, Leoleo ma Falepuipui ma le Tinei Mu):** Faafetai i lau Afioga i le Fofoga Fetalai mo le avanoa. E muamua ona faatalofa atu i lau Afioga i le Fofoga Fetalai, lau Afioga i le Palemia ma le Sui Palemia, le Kabeneta ma Minisita Lagolago, afioga i Taitaifono ma Komiti Faa-Palemene a le Maota, Ofisa Sili o Pulega o Matagaluega ma Faalapotopotoga a le Malo, lau Afioga i le Failautusi o le Fono Aoao ma lou Ofisa.

Le tapuaiga a Samoa i le afio o Lana Afioga Mamalu O Le Ao o le Malo ma lau Masiofo, lau Afioga i le Sui o le Fono a Sui Tofia ma lou faletua. E faatalofa atu foi i lau Afioga i le Faamasino Sili ma le mamalu o le Faamasinoga, taitai o Ekalesia e fia o auaua a le Atua aua le tauasuina o le

ipuvai o le ola i itu e fia o Samoa, le faafofogaaga a Samoa i lana tapuaiga. E faatalofa atu foi i si ou itumalo o lo o faafogafoga mai, malo le tapuai.

Lau Afioga i le Fofoga Fatalai, e tusa ai ma nisi o mataupu faasaga i Matagaluega e lua o lo o ou tauaveina, le Matagaluega o Tiute ma Tupe Maua, faapea le Matagaluega o Leoleo ma Falepuipui. Sa laga ma fesiligia e sui usufono sa saunoa i a latou lauga mo le Tala Faaopoopo o le Tupe 2019/2020 aemaise le Tala o le Tupe mo le 2020/2021. O le a amata se faamatalaga i le Matagaluega o Leoleo ma Falepuipui.

Lau Afioga i le Fofoga Fatalai, e le o po se lilo i le Palemene nei i le toe tuufaatasia o le Matagaluega o Leoleo ma Falepuipui i le amataga o le tausaga lenei. O se suiga ua toe foi ai i tua i le vaitaimi sa umia ai foi e le Matagaluega o Leoleo le vaiga o le falepupui ma le Ofisa o Leoleo. E moni lava e fou, a o le suiga tuai sa i ai muamua. Na laga e nisi o sui usufono le mataupu na tupu mai i uta i le falepuipui e tusa lea ma le solaaga a pagota. E talitonu ua uma foi ona avatu se faamatalaga i le Fono talu ai, e faamalulu atu ai i le mamalu o le atunu aemaise foi itumalo o lo o latalata ane i le falepuipui i Tanumalala. E muamua ona avatu le faafetai e ala atu i tou sui usufono e tusa ai ma le lagolago i lea po, e le mafai e leoleo ona fai toatasia le galuega lea ma le ofisa o le falepuipui pe ana le seanoa la outou lagolago. E momoli atu ai le faafetai ma le faamalo i le tou tali mai o le valaau atu.

I le po lea o le faalavelave lea, e le i leva ona tupu ae ou taunuu i o, na ou vaai ai lea i le tulaga ese ua i ai le falepuipui i lea po, ua malepe uma ofisa, aemaise foi faitotoa, taavale ua talepe ma faaleaga, a o le toatele o e na o i fafo i le po lea, o lea lava tatou te silafia e 36 na o i tua, e toa 7 na toe maua i totonu, e 29 lea na mafai ona toe omai i le po lea ma toe foi mai totonu ma le toa 3 lea na maua mai i le taeao o le isi aso. A o le vaiga i lea po i e uma na toe foi atu, e leai ma se isi e savalivali lelei atu, a le etu le vae, maosiosia. Aisea? A tagatagai atu i le nofoaga lea, e matua laugatasia lava i le tilotilo ona o vao ma mea la e faaaoga e lafumanu papalagi. A o lalo atu, o le matua maamaai o maa la e i ai, o le matua maamaai lava, e faigata ona e momoe ai. Na pau lava le auala e faigofie o le alu i le aualatele ua uma ona sua. O le tulaga foi ua toe tuufaatasia ai nei, atonu o se mea foi lea ua maua mai ina ua tupu le faalavelave i lea po ua toe foi mai ai i tai i ona o le Matagaluega a Leoleo e 700+ le aufaigaluega, a o uta i le falepuipui, na o le 145 le aufaigaluega sa i ai, e toaitiiti le aufaigaluega. O le taimi la lenei ua tuufaatasi Matagaluega nei e 2, masalo po ua oo i le 800 le tuufaatasiga pe ova atu le aufaigaluega a le Matagaluega o Leoleo ma Falepuipui. O lea la ua amata ona o atu le aufaigaluega i i i Apia galulue faatasi ma le vaega o lo o i uta i Tanumalala, atonu ua talafeagai foi lea, ona e ui lava ina valavalava Matagaluega nei e 2, ae le mafai ona valavalava i le faatinoga o galuega, aua a o i tua pagota, o leoleo e aapa mai i ai e fesoasoani i ai. Sa valavalava lava la ma tuuksesese, ae le mafai ona tuukseseseina galuega fai. O le taimi la lenei ma le tulai mai o le Komesina ma le Sui Komesina ma Faauluuluga uma o

le Falepuipui ma le Matagaluega o Leoleo. O le Matagaluega o Leoleo, ou te talitonu o se vaaiga lelei lea a le Malo e toe tuufaatasi ai Matagaluega nei, ua aumai ai ma leoleo ia te au, e le o toe faigofie le galuega, ia ae talitonu o le fesoasoani a le Atua ma le loto e mafai ai ona faataunuu galuega ina ia lelei mo le saogalemu o le tatou atunu.

O fesili la ua tuuina mai faapea e silasila i totogi o leoleo, lau Afioga i le Fofoga Fetalai, o le Matagaluega lenei o Leoleo, o le tele ia o ona Vaega divisions, e 23 divisions. O vaega nei e 12 divisions o lo o faauluulu i Superintendents, e 11 divisions o lo o faauluulu e Inspectors, ae o totogi pe a tuu mai i le tele o Matagaluega a le Malo, o la e i lalo uma o le principal level. A o galuega lea latou te faia, e matua taua mo le manuia lautele o le atunu. Ou te le o malamalama tele i le mafuaaga po o le mea e le fia oo i luga i le salary lea e i ai le ACEO ona e tai 3 tausaga ma toe faafou, a o lalo i i le principal level, e te litaea lava o e i ai.

I le vaaiga la i lenei taimi ma le gasolo i luma, o lea ua uma ona ave i le tribunal e taumafai e sii ma faatulaga totogi o le Ofisa o Leoleo. Ia au lava ia ma le taumafai e toe faaleleia le auaunaga, e leai lava se isi e le manaomia le alualu agai i luma, e leai se isi. Atonu lava a tuu avanoa nei i luga o le ACEO level i le salary level, atonu o le a tai 3 tausaga ma fai atu interviews ma mea na. O lea ua i ai avanoa i tagata uma e o i luga, atonu e faigofie ai foi ona faatino galuega.

O Savaii, ia au lava ia i Savaii, o le Superintendent la e i ai e totogi foi i le totogi o le principal level. A o le motu o Savaii, ia au lava ia, e tatau ona i ai se Deputy mo Savaii ma se Manager o Savaii, leaga e eseese le tele... ta te le malamalama tele foi i mea nei o Superintendents, o Corporal o isi mea uma na e faigata ona ota matauina aemaise foi a ta fetaui i ai, masalo na o Superintendents tate iloa ona o latou fusipau faapena foi Inspectors. A o isi vaega i lalo, e tasi lava lata vaai i ai na o latou i le Ofisa o Leoleo. E maualuluga totogi o le falepuipui, o le mea moni lena, o le starting rate salary lea e amata ai leoleo i o, aemaise foi la le Ofisa o Leoleo, e maualuga o ae o lea o le a taumafai e tuu atu i luga... Ia, o le talitonuga lena i le na aumaia le fesili e toe silasila i totogi, o lena ua tapena le Matagaluega mo le agai i luma ina ia faataua ma amanaia le galuega, ave le totogi e tusa ma le galuega o lo o e faatinoina.

O isi fesili o sailini mo le falepuipui. O le taimi nei o lo o tapena, o la e oka le sailini lea mo luga o le falepuipui i le taimi o le faalavelave ona iloa ai lea e nuu tuaoi, aemaise foi itumalo se mea ua tupu i le falepuipui ona o le sailini lea, ma e le maua i inei ituaiga sailini e tatau ona faaaoga... e maua i inei ituaiga foi lea, e mamao le mea la e i ai le falepuipui. E manaomia se sailini lelei tele e mafai ona lagona atu i nuu tuaoi.

O taavale, fai moli sulu foi ia ua matautia le toatele, ma o lea na fesiligia mai po o le a se faiga a le Matagaluega i ia ituaiga taavale. O le aso 1 o Iulai le vaisaso lea e take over ai e le Matagaluega o Leoleo ma Falepuipui le traffic

o lo o i lalo o le LTA. Ia, a oo mai, o le a tagatagai le Komesina ma le Matagaluega i le toe aveesea o moli nei faasoesa, ua matua, o isi moli e matua emoemo mai lava, faapea oe o se taavale a leoleo la e sau ae alu atuga e leai. O musika, ua toe ae mai musika i totonu o taavale e papakukui. E lelei lava, ae a o i nuu i tua, ia, ta te alofa atu foi i e ona taavale, aua ou te masalo e leai lava se mea e fetaui ma latou i le faatiga taliga i le papatutui o musika. O le safety foi o le auala o le mea e tatau ona fai. E pei la ona talanoa atu, o le vайaso muamua o Iulai o le a tele se suiga o taavale nei. A faapea na, aua a avatu foi e pasi i le taimi lenei i le LTA, e aveese uma lava mea nei ona o atu lea pasi le taavale. Ma a uma foi omai toe faapipii toe o i le atoa i le auala. O lona uiga la o le matafaioi lea a le Ofisa o Leoleo o le a i ai, o le a nafa ma le toe faamamaluina o Tulafono ia, a maua oe i le aualatele ua tatau ona ave e loka lau taavale i tai i le Ofisa o Leoleo se i talai ese uma mea ia. Na pau lena o le faiga e mafai ai ona suia lea aga lena foi musika, ave e talai musika ia a uma auction e leoleo, e tatau ona fai i ai se faiga. O le a vaavaai foi le, o le mea la lea e faaletonu ai le mea foi lea o le suetupe ma le vaai lautele. O moli ia emoemo, o le a tagatagai i ai le Matagaluega pe tatau ona toe aumai i totonu. A tuu la i lou tulaga o le Minisita o Tupe Maua, ia ua misi foi le tupe i le le toe aumaia o le masini lenei. Ae se i oo atu i le taimi lena se i talatalanoa Matagaluega nei e lua po o le a se faiga e fai ai, a o le mea taua lava pe aumai ae aua lava ne i faapipiia i taavale. Ia e fai fai lava fiu le tagata lea e aumaia moli nei faasoesa i le auala e aumai aua o le a le toe faataua e nisi. Ae se i oo atu i le suiga o Matagaluega nei e lua.

Saoasaoa o taavale i le aualatele. Ia, e tasi lava le mea e fofo ai le faafitauli lea, o camera i le aualatele, camera. E le taugofie, e taugata. O lea e taumafai le Ofisa i le mafai e mafai ona fai ai, ona e le lava foi le aufaigaluega e taape atu ai e tutu i malagaala eseese ma camera e pue mai ai le au saoasaoa lea e fai tuuga taavale. O uta i le matou vaega la e i luma o le faletaalo ma mea na, ua laki o nai hump na, pe fai ai tuuga taavale i vai auala ia. Ia, ae o le a taumafai e ese foi le tatou aganuu ma le tatou atunuu, tatou te taumafai lava ia maua le tatou mea na masani mai ai tatou ina ia faafaigofie ona tuuavanoa a ua oo mai lava le taimi ua le mafai ona taofiofi le aganuu ma mea ua oo mai. Ua fiu foi e control. Na pau lava la le control, sui Tulafono. Sau lava le camera maua lau number plate okometi lau sala. Na ona logo atu lava e totogi le sala ae tele le suiga o Tulafono e fai ia mafai ona activate, e tele foi le seleni a le Matagaluega o Tupe e alu ai i le faiga o suiga o nei mea pe a oo ina faa-street camera uma le auala, aemaise lava magaala ia e iloa le ia talofa, le auala lea e alu atu i Faleolo, ou tietie ananafi i le afiafi e tau lava i o i Saleimoa i le mea ua oo atu i ai le asphalt o le matua manaia o auala ia e alu i le atoa. Ae faafetai foi i patupatu la e ua fai e tau taofiofi ai, a o le tulaga lena e oo i ai le auala lea. O lona uiga o le a faa-street camera le, o le auala muamua lava lena e tatau ona pipii, ae pei ona fai atu e le faigofie e umi se

taimi, e sui Tulafono mai le Palemene, le iloa pe ou te talanoa atu i se isi Paeaiga, ae le tatau ona tuua.

Insure o leoleo, o lea ua saunoa le Afioga i le Minisita o Tupe, o lo o i ai le insure o leoleo ma fuimu, aemaise foi o le taimi lenei i le Koviti-19 o a ni mea e tutupu mai ai, o lo o i ai le insure. Na pau le mea lea na saunoa i ai, e toe tilotilo i le toe faaleleia atili ona e le faigofie galuega.

**FOFOGA FETALAI:** Oi, ia se i tulai mai le sui usufono mo Aleipata Itupa i Lalo.

**Afioga Tafua Maluelue Tafua (Aleipata Itupa i Lalo):** Lau Afioga i le Fofoga Fetalai... Faafetai. E faatalofa atu i lau Afioga, ua ou vaai atu ua e te i i lau oi, ai e te le i vaai mai ia te au, ae faatalofa atu i lau Afioga.

**FOFOGA FETALAI:** Leai o lea e sesega lau... Aua e le faapea o le a ou tilotilo atu ia te oe i taimi uma, ioe.

**Afioga Tafua Maluelue Tafua:** A o lea ou te tilitilo atu ia te oe i taimi uma.

**FOFOGA FETALAI:** Ia o le a tuu atu le avanoa. Saunoa lau Afioga ae le o le...

**Afioga Tafua Maluelue Tafua:** Lau Afioga ma le faaaloalo, ia ou te le fia faalavelaveina lava le saunoaga mamalu a le Afioga i le Minisita, ae o le vaega lea ua ou tulai atu ma le agaga faaaloalo, ona o le vaega lea na e taua nei o le vaega foi lea o faapatupatu, lea sa ou taua ai. Pei o le agaga lava o nei mea o faapatupatu, it's one of the mechanisms o se tasi o vaega e faaalualu lemu ai taavale a o lea na e taua e taugata mea o speed cameras. O lea ou te talosaga atu ai, e le o lau vaega lea ia o lea foi e faafogfa mai le Afioga ia Papalii, ae a pe a tatou tilotilo i nisi vaega, e le o le faapatupatu aua e le gata i le faaleagaina ai o taavale a tagata pe a soona o i luga o le faapatupatu. Ae manaia lava le i ai o ni petrols a leoleo foi nei pe tai 4 kilomita ma tutu taavale a leoleo i le auala foi lele e le gata ina faatalitali le taimi e valaau mai ai latou mo incidents e tutupu, ae aoga foi o la e le iloa foi pe te i ua maua ai se isi gaoi e savalivali atu ma se piano a se isi aiga. Ma le faaaloalo.

**FOFOGA FETALAI:** Malo. Ia se i tulai mai le sui usufono mo Faleata Sisifo.

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fetalai, faafetai lava i lau Afioga. Ia se i fai sina koma a le Afioga i le

Minisita e umi ma tele ana Matagaluega. Faafetai lava i le Afioga i le Minisita ua toe laga le tulaga le o le Deputy, Sui Komesina o Leoleo i Savaii. O lenei mataupu i le taimi o matou Komiti o Tupe, matou ma Tafua, na matou laga ai foi i lea taimi, leaga a vaavaai i Matagaluega ia e i Savaii, o le tele lava o Matagaluega e i ai o latou o latou Sui Pule i Savaii, Pule Lagolago. Ae na o le pau lea o le Matagaluega e aupito sili ona tele e leai se Deputy o i ai. Faafetai lava i le Afioga i le Minisita ua toe faamanatu le mea taua lava lea.

A o le mea lea ou te fia fesili atu ai i lau Afioga, ona o lea sa tele le suesuega a le Komiti o Tupe i le vaega tonu lava lea o entrypoints i leoleo, leoleo falepuipui, leoleo i i. O le mea lea e faateia ai lou tagata, sa ou faapea o mea nei o entrypoints e taufai tutusa lelei lava e fua i galuega fai ma faailoga, a o lea ou te vaai atu e eseese. O lea la ou te fia fesili atu ai i lau Afioga i le Minisita pe fesoasoani mai foi le Afioga i le Taitaifono o le Komiti o Tupe, leaga o lea e le o maua tonu mai i le latou suesuega po o le a tonu le mafuaaga na mafua ai lea mea. Ma le faaaloalo lava.

**FOFOGA FETALAI:** Malo faafetai. Se i tulai mai le sui usufono mo Salega Sasae.

**Tofa Olo Fiti Afoa Vaai (Salega Sasae):** Faafetai lava mo le avanoa. E leai e puupuu lava foi. Faafetai i lau Afioga i le Minisita mo le faamalamalamaina o nisi o Vaega. Ae na ona ou faamanatu atu i le Afioga i le Minisita, o le issue lea i totonu o le Ofisa o Leoleo ua leva ona tatou faalogologo ma outou faalogologo iai, o le le lava o le staff, e le lava malu o le Malo e faatinoina galuega. Ua 60 tausaga o aumai lava le tulaga lea, foi lele i le tulaga lea pei ua ou faalogologo atu o le a fai speed cameras, e taugata foi lena mea. O lena ua e saunoa manino e taugata a e vaai i le tele o le tupulaga o le tatou atunu aemaise e ua iu mai aoaoga i le secondary school e aumai totonu o le Matagaluega e faatoatele ia lava tagata faigaluega ma uunaia ai foi lea o tagata faigaluega aua ua toatele nai a tatou fanau lea e le o maua ni galuega.

O lona lua lau Afioga i le Fofoga Fetalai, ou te faafesili atu pe le i tau se tofa foi a lau Afioga i le tulaga lea o le outsource atu o le laiseneina o taavale lena ua i lalo o le Matagaluega o Leoleo i inisinia foi ia, ia matua mataitū inisinia ua qualify lelei tai pei o mea ia e fai i fafo ia comply i mea ia e tou te finagalo e laisene ai taavale, ona e alofa foi lele i le mamao o le tauasa mai o le atunu mai tua, ae omai uma lava i i i Fagalii i le mea lea o le a laisene ai taavale. Na o se faafesili lena i lau Afioga. Ma le faaaloalo.

**FOFOGA FETALAI:** Malo faafetai. Tulai mai le Minisita. Ou te fautuaina lau Afioga i le Minisita o a mea sa laga...

**Afioga Hon Gatoloaifaana Amataga Alesana Gidlow (Faasaleleaga Nu.1 i Sisifo):** Lau Afioga i le Fofoga Fetalai...

**FOFOGA FETALAI:** Ia malie le Minisita se i tulai mai le sui usufono mo Faasaleleaga Nu.1 i Sisifo.

**Afioga Hon Gatoloaifaana Amataga Alesana Gidlow:** Faafetai tele lava mo le avanoa lau Afioga i le Fofoga Fetalai. Ou te tulai atu e fesoasoani i le tulaga lea ua laga i le entrypoint a leoleo, leaga o au le Taitaifono o le Komiti Faa-palemene lea o lo o matou lotea tulaga o le Matagaluega a Leoleo, o le isi lea mea matou te fautuaina tele. O lo o fesiligia po o lea le mea ua, ona e leai ni faailoga o leoleo a o lea e tau faatusatusa latou entry points. O le agaga ma le manatu i le matou Komiti, o le soifua o alii malu o le Malo, e tau le faia se faailoga. E talia loa oe i totonu o le Fosi, o lou soifua lea ua i luga o le laina. O le a le mea e tulai mai, e leai lava ma se isi mea e te lafi ai pe e te malu ai. E te alu i luga o lou tiute. O lea foi la na i ai lo matou agaga, e tatau ona fai se taui talafeagai mo le soifua lea ua ofoina atu aua le malupuipua o Samoa. Ia o se fesoasoani atu lea lau Afioga i le Fofoga Fetalai.

**FOFOGA FETALAI:** Malo. Ia, se i fesili atu lava; o le mea lea e te faasaoa e te fia malamalama i ai sa lavea i lau saunoaga? Aua leaga o le tatou Tulafono Tumau lena, e te fesili ma e faauilavea i mea sa lavea i lau saunoaga ae le i tali mai le Afioga i le Minisita. E maumau fua la le taimi e tou te tutu mai ai, a o lau fautuaga i le Minisita, afai e le i lavea i le saunoaga a le sui usufono, aua le maumaua fua lou taimi ae tulituli le tatou Fono, ae tuu atu pea le avanoa i sui usufono mamalu leaga e faigata o sui usufono...

Tulai mai lau Afioga i le Taitaifono o le Komiti o Tupe faamolemole. E le faapitoa manu ia tasi i lau faamatalaga, ae o le tatou Tulafono Tumau lena. Tulai mai lau Afioga i le Taitaifono, le sui usufono mo Alataua Sisifo.

**Afioga Aliimalemanu Alofa Tuuau (Alataua Sisifo):** E faatalofa atu i lau Afioga i le Fofoga Fetalai i lenei taeao fou. E leai o le ala o le tulai ona o lea sa fesiligia le lipoti a le Komiti Tupe i le tulaga lea, po o le a se sailiiliga leaga o lea e i totonu o le Lipoti le matou faatalanoaga ma le Komiti lea e iloiloina le suesuega o totogi, lea foi o lo o i ai i totonu ma le totogi o Leoleo, Falepuipui, o le FESA, le Fuimu. Ia o le tali na tuuina mai, e ala ona eseese entrypoints, e fuafua i risks mo luitau po o faafitauli e aofia i totogi taitasi. E eseese risks e involve i le leoleo o le falepuipui aua o lea e feagai ma pagota, vaeatu lava le paia o le Maota nei, eseese risks e feagai ma le vaega lea i le FESA ona o mu ma tulaga e pei ona i ai nei foi tatou faalavelave lea e le i leva atu. E eseese foi risks e feagai ma leoleo auala.

Ia o se tali atu lena i fesili lea e taua ai le matou Lipoti. Ma le faaaloalo faafetai.

**FOFOGA FETALAI:** Malo. Ua manino auofala i lea tulaga. Lau Afioga i le Fofoga Fetalai...

**Tofa Aumua Isaia Lameko (Falealili Sisifo):** Faafetai. Sa laga i lau lauga le mataupu lenei e faatatau i le mataupu lenei e mafuaaga e ala ai ona eseese entrypoint a leoleo, totogi o auaunaga nei e tutusa lo latou faatinoina. I le tausaga e 2008 sa sainia ai e Samoa, avea ai Samoa ma sui o le Faalapotopotoga Faava o Malo o Leipa, ILO, sainia e Samoa le tatou convention lea e 100 i le 2008. E tutusa ai totogi o tagata i le entrypoint o galuega e tutusa. E pei o le ala lea o lou laga o le mea lea, o lea ua uma ona saini Samoa i le tatou Tulafono lea faa-va-o-Malo. A e na ona silasila i ai o le tatou Tribunal pe le alagatatau ona faatutusa totogi o auaunaga ia a Leoleo, ma le agaga faaaloalo.

**FOFOGA FETALAI:** Tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** E i ai le Faiga Faavae a lo tatou Malo, o le Faiga Faavae lea na amata mai i le 2001. Na faatu ai le tatou Komiti, o le Komiti lena e faatulagā ia totogi. E afua lea ona o le eseese o faiga sa fai ai ia totogi, mai lava i le amataga. E oo mai la i le taimi lea, ua matua masofasoafa le va o totogi. O lea lava na iu ina savali tetee ai le aufaigaluega a le Malo i le 1981. Ona toe taumafai foi lea i ai o fomai, e le o fomai uma, e faataitai i le 1981, ae o lea ua taoto le fua e fua ai totogi ma le vasaga o totogi. O le a la le mea na tupu i le tetee lena? collapse, e le i i ai se taunuuga lelei. Ona o le uiga lea e manao lava le vaega ia e sii i luga totogi, manao lea vaega e sii i luga o latou totogi. Fai mai le isi vaega e tele atu le risk o latou, fai mai le isi vaega e sili atu ona taua latou. Na oo lava i le Palestine, ua faapena mai luga totogi, ae faapea atu i lalo totogi o le Palestine.

Ou te manatua, pe faa-lua ona aumai e le Afioga ia Tofilau le tulaga, ua tatau ona faatulaga totogi o le Palestine, ona ua i luga ia totogi o le aufaigaluega a le Malo, ae lalo lava ia totogi o le Maota lenei, a o le Maota lenei sui usufono lea e alu atu ai faaiuga e faalogo uma i ai le Malo atoa. E mafua i se a? E aumai lea fuafuaga a le Malo, tetee le Itu Agai, ma fai a latou lauga, talofa e i le atunu. Talofa e, o la le e matitiva a o tatou lea o le a sii totogi. A o le Palestine o Samoa i le taimi lena, o le Palestine pitosili lea ona maualalo totogi. Oso ane loa ma le augata o le Malo e toe fai na mea, galue ai pea le Palestine i totogi pito i maulalo, ona o le agaga lea, sa leai se itutino o le Malo e i ai le vaai mamao i le faatulagaga o totogi. O le tulaga

lea na i ai, o lea na teuteu ai loa le Tulafono, o le a tasi le tino latou te faatulaga totogi le vasaga o totogi. O lea lava la e taumafai ina ia faatumau le mea lena, ia aua ne i maoae le oso i luga o le isi ae pau i lalo le isi, i le finau lava lea, finau mai lava le isi o matou e sili atu, e tele le risk, e tatau ona tuu i luga. A o fea e sau ai le tupe? e sau mai le atunu. E fuafua foi la e le Malo, ia tatou totogi ma totogi o le aufaigaluega fuafua i le atunu lea e tilotilo mai ia tatou faiga.

Lau Afioga i le Fofoga Fetalai, e faapena le mea, ia paleni le vaai i o tatou totogi, totogi o le aufaigaluega, ma se i vaavaai po o le a le atunu lea e i ai. Ae o le laititi ane lava faatusa ia Ausetalia faatusa ia Niu Sila. Lau Afioga i le Fofoga Fetalai, e le mafai na faatutusa tatou ma Niu Sila ma Ausetalia. O le faavae foi lena o lea e sau ai le mea lea, se i vaai i loia ua maualuluga tele o latou totogi. O le tulaga lena lau Afioga i le Fofoga Fetalai, o lea foi la e ala ai ona taua le mea lea. Ua maualuluga tele totogi o latou ia e i o, ae leai se mea e tatau ai ona soona tuu tele i luga. Lau Afioga i le Fofoga Fetalai e le faigofie le mea lea o le faatulagaga o totogi. Ina ua uma ona tuu i luga totogi a le Malo, ae sau le toatamai o le Private sector, ua matua feita i latou o lo o feagai, le au kamupani. Aisea? Leaga o latou ia e gafa ma le tele o galuega, o lo o faafaigaluega ai le atunu atoa. Silasila foi i le faiga o sikolasipi, na ave sikolasipi i fafo e foi mai galue i le Malo, ave i fafo foi mai galue i le Malo. Ua alu alu alu le mea, ua toatele tagata aoaoina ua foi mai, ae ua le mafaia e le Malo ona faafaigaluega uma. Sui loa ma le faaiuga a le Malo, sikolasipi uma e toe foi mai, tatala, tatala le avanoa e o ai e auaua i tua, po o pisinisi a o latou aiga.

E pau lava lea o le mea, a 6 tausaga na e alu ai i o, ia taumafai foi e 6 tausaga o e nofo i Samoa nei. Ia aoga tipe a le atunu na ave ai oe i fafo, se i e tautua i le atunu, ae ala i le faaleleia o pisinisi a outou aiga. Po o pisinisi a isi kamupani ina ia ola ai le atunu. O lea ua i ai le tatou komiti o le tribunal. O le latou galuega lea e faataoto le structure atoa, le ata atoa o totogi, e faatulaga ai lea profession i lea profession i lea profession. Starting point ma le tulaga e oo i ai tumutumu, ona faagata ai lea i ina, se i toe vaavaai po o le a le mea e fai. A ia o tatou manatua, o ai ea le atunu lea tatou te galulue ai, o le atunu na alu a latou tipe, pe aumai ia Niu Sila pe aumai i Ausetalia a o tipe na aumai, o tipe lava a le atunu lenei na faaaoga ai. A maua la ni faailoga, maua le poto masani, ua maua le poto faapitoa e o mai e galulue i totogi ua mafai ona faatulaga e le atunu. Ae le o le manao lava e tuu i luga ma tuu i luga tuu i luga, vaavaai po o le a le atunu lea e galue ai? a o a mea ia e maua ai a latou tipe? Lau Afioga i le Fofoga Fetalai, o le tulaga lena, o le mea lea ua tupu nei, e pei ua tau galo ia i latou, na ave e le atunu i fafo, o tipe a le atunu foi mai tagi i totogi, tagi i totogi. O le a le totogi e te maua, o lau tautua lena i le atunu. E oo foi i le taimi na matou o mai ai. O lou totogi na ou sau ou amata ai e \$28 i le 2 vaiaso. E \$28 i le 2

vaiaso, ae sa matou galulue lava, a o le tulaga lena, ua alu alu alu, ua le lavava e tagata le maualalo o totogi, strike loa i le 1981.

Lau Afioga i le fofoga Fetalai, o le tulaga lena, e fai ma fuafua i tupe e mafai ona maua ma faasoasoa, i le tulaga o tatou galuega ma le faagaoioiga o le Malo. Ma ia i ai sina tupe e fai ai le atinae. O atinae, e fanafanau mai ai galuega, fanafanau mai ai ma totogi, e maua ai tupe a tagata. O le ala foi lena o lea e taumafai ai le Malo, saili i fafo isi galuega, isi galuega mo tatou tagata. E faamalie Niu Sila faamalie Ausetalia, e tuu mai le avanoa mo tatou tagata, e o atu ai. O lea ua oo lava i le 3 tausaga e mafai ai ona e alu i Ausetalia, e galue ai faavaitaimi e toe sau asiasti i le aiga e toe alu. Toe sau toe alu toe sau, 3 tausaga ou te ofo i le uma o lena 3 tausaga e le i fia ni tou fogafalelua, ma ni taavale e feoai ai.

Lau Afioga i le Fofoga Fetalai, o le mea lena o lea e fai e lo tatou Malo, e i ai foi le atugaluga, o le atugaluga tele lava, o lea sa manino i le aso ananafi e tatau ona toe tilotilo i ai le Malo. I le 2 o faiaoga lea sa agai i ai, o le tasi lena mea ua aafia ai tatou. I le mea lea o le alu alu alu, ae faaletonu atu ia leoleo, faaletonu atu ia faiaoga lelei ua o i fafo. Ona o le 1100 lea e alu pea i fafo, e tatau ona toe tilotilo i ai le Malo. E lelei ona ave mo i latou e le o i ai ni galuega, ae taofi pea i latou o lea e faalagolago i ai le Malo, aemaise o i latou i essential services nei pei o education faapea foi ma falemai. Lau Afioga i le Fofoga Fetalai, o le soso atu lena, e le faigofie le galuega lea e taumafai i ai le Matagaluega o Leoleo, ua ou le iloa pe ua faafia ona ou alu e tatala lea vaega ua graduate, le vaega fou. E toatele le vaega fou lea ua hire, e toatele, ma toe faatulaga uma o latou totogi ma e tatau lava ona i ai se vasaga o totogi mai lea profession mai lea poto faapitoa i lea poto faapitoa, ae le o le tuu lava o le isi e oo lava i luga.

O le ala foi lea ua tau toa toa mai ai, ia latou o faiaoga, ma falemai ma teine tausi soifua. O i latou ia sa tele ina tu ai le pituli, ona sa faaeteete tele le Malo i tausaga ua tuanai. Aisea? Leaga e 1% ae faitau miliona ma miliona ma miliona tala i le toatele. E fulisia i ai ia tupe alu i tagata faigaluega, o le ala lena e matua mataitu lelei ai e le Malo ia services nei e 2, o fomai, o teine tausi soifua faapea foi ma faiaoga. Ina ia tau i ai se vasaga ma isi foi profession. Lau Afioga i le Fofoga Fetalai, taatia maia le galuega, e le faapea o laaloa ai le vaai a le Malo, o le ala foi lena na faatu ai le ituaiga faalapotopotoga o le Special Tribunal, o le latou lava lena galuega o le vaaiga o le vasaga o totogi faatusa i le tau o le soifuaga ua alu i luga, faatusa i tupe ia o lo o mafai ona fai i ai a tatou faaiuga.

**FOFOGA FETALAI:** Malo faafetai. Tulai mai le Minisita o Tina ma Tamaitai, ona tulai mai lea o lau Afioga i le Sui Sofoga Fetalai.

**Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioaga ma Agafesootai):** Ou te tulai atu

lava, leaga o lea sa taua le totogi o fomai. Na o sina tala e fia faailoa atu i le Maota, o le 1970, lea na amata ai ona ou faigaluega i le falemai. O lou totogi sa i ai e \$1,200 i le tausaga. E tusa la e \$35 ma ona tupu i le vайaso. E pau lea faafetai.

**FOFOGA FETALAI:** Tulai mai le sui Fofoga Fatalai.

**Tofa Nafoitoa Talaimanu Keti (Gagaemauga Nu.3):** Faafetai i le avanoa ua tuuina mai e lau Afioga i le Fofoga Fatalai, mo lenei itumalo a o lenei foi sui usufono. Ua se ligoligo a ua manino ma malamalama le saunoaga a le Taitai o le atunu. Tulaga e pei ona i ai le faavasegaina o totogi ma aulape e afua ai. Ae e le mafai ona matou nofonofo, a talanoa i le Ofisa o Leoleo, e tatau ona ou tulai e fai sau faamatalaga. Leaga sa inu ai, sa tofo i ai, sa lagona i le loto le tulaga o le ola galue ma le ola tautua, 35 tausaga. A lea ua faamanuia e le Atua, fai ma tofi ole itumalo aua le Maota ma le Faigamalo. Ou te momoli atu le faafetai tele i sui mamalu uma o le Maota. O la e faafogafoga mai le aufaigaluega, o latou ua i ai le faalupega o malu o le Malo, alii ma tamaitai, o alo ma fanau a le atunu ua ofoina le soifua mo le tautuina o le Malo, e ala i le Matagaluega o Leoleo. Faafetai tele o lea ua oo i ai le saunoaga a le Taitaifono, sa latou lauliliuina le tulaga o le faaleleia o le auaunaga lea, e tatau ona fai. Ua onomea ma tatau, peitai o le talanoaina ma le taua o mea ia o risk. A outou Afioga, e au lava i le taeao le Matagaluega o Leoleo, e inu i mea ia. Amata lava le galuega i le taeao, a tu le leoleo i le aualatele, e manava lava kesi o taavale mai le taeao i le 7 i le taeao. E amata galuega a leoleo e le i amataina galuega a le Malo. E iu lana galuega ua uma uma tagata i le fale, faigaluega a le Malo. O le tele o le aafiaga, o le ala la lea na ona tau faatepa i ai, o le ala lea o le momoli ai o le faafetai. Afai o lea ua saunoa le Taitai o le Malo, taoto atu la e silasila ua tatau ona sii. Se faamolemole lau Afioga i le Minisita e tatau ona faatino le faamoemoe lea e talosaga atu ai. Aisea? Ona o le agaga, o lea e saunoa le sui usufono mo Faleata, le entrypoint, e pau lava lea o se vala laititi. A oo atu i luga i qualification ma isi mea uma, ona faavasega loa lea i ina, ae faauma atu ai ma se matou faamatalaga, se i alofagia le Matagaluega o Leoleo ma Falepuipui.

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ua ou vave tu atu e fia faasao ne i te i ua sese tele i le saunoaga a le sui usufono. Ua uma ona faia isi siitaga a le Matagaluega a Leoleo talu ona tulai mai le Komesina o i ai nei. E tele lava ia le submission le pepa lea i le Kabeneta na ia aumaia. Ona fai ai foi lea o isi siitaga, ae sa tapa le tuualalo po o le fautuaga a le tatou

Tribunal po o le Komiti faapitoa e faatulaga le vasaga o totogi. E faapena foi i isi, afai e tuai ona fai i ai faaiuga, o le mafuaaga lena, e tapa lava e le Kapaneta le tuualalo a le Komiti lea o le vasaga o totogi, ia aua lava ne i tele se tulaga e feeseseseai ai, ma le isi mea, e fai foi ma vaavaai i le tulaga lautele o lo o i ai le faataotoga o totogi a kamupani ina ia o gatasi. Aua o le taimi e eseese ai, ona tupu loa lea o le faalavelave ua amata foi ona tatiai galuega a tagata o lo galalue i kamupani ae o mai i le Malo. O le ala lena e le tatau ai ona tele se eseesega, ina ia tumau ai pea tagata o le Malo i le Malo, tumau foi tagata i le Private sector. Aua ne i i ai se tulaga e jue ai le sa o Samoa ma afaina ai le atinae i le la foi itu o lo o aumaia le lagolago tele i le agaga e tasi ia maua ni galuega. Mo fanau a le atunu o lo o nonofo mai aoga i tausaga uma. Lau Afioga i le Fofoga Fetalai, e le faapea o se mea e le o faia, o lea e fai. E pau lava le tulaga, o si tamai vaega lea na saunoa i ai, o si tamai eseesega lea ua eseese ai totogi o i i le Falepuipui ma le Leoleo lautele o le tatou atunu, o lea e mafua ai a outou saunoaga. Ae taatia mai o lea e i ai Mose ma le auperofteta latou te vaaia ia mea. E le faapea e fou, e le o se mea e fou. O lea e fai ma tilotilo pea i ai Minisita ma le Komesina ma aumai foi i le Kapaneta.

**Afioga Sulamanaia Fetaiai Tauiliili Tuivasa (Vaimauga Sasae):** Lau Afioga i le Fofoga Fetalai, mo le faasaoina o le taimi o le Afioga i le Minisita, ona o lea sa taua i lau lauga lau Afioga.

**FOFOGA FETALAI:** Malie le sui usufono faapuupuu mai, leaga o lea ua tele ina pei e lauga ia sui usufono, ae o le faauiilavea o le mea e fia faasao ma fia faamalamalama, faamolemole na ona tapa, faamolemole ou te fia malamalamala i le mea lea, faamolemole faasao le mea lea. A o lenei o le lauga le mea e fai, o le mea lena e le fetaui ma le tatou Tulafono Tumau. Tulai mai le sui usufono mo Vaimauga.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai ma le agaga faafetai ona sa taua i lau lauga insure a leoleo, e le o po se lilo o lea sa saunoa manino foi le Minisita o Tupe lea ua vaai i le tulaga lea i ni insure. Ona e matau lava ma le agaga o le faafetai i le osofaiga pea o lo o fai e leoleo i laau faasaina. O le agaga lea sa tatalo atu ai le sui usufono, pei o lea ua lagona foi le agaga faafetai, pei sa taua foi i lau lauga ia totogi ia, ona e pei e ese uta.... o le Matagaluega a Leoleo e pei e leai ni ovataimi, e pei e galalue faapena, e pei e esese ma gauta i le falepuipui. Se i silasila ane o lea ua saunoa le Taitai, o le tulaga lena o lea ua ou tulai atu ai, o le agaga faafetai i insure ia. A e o le Sui Fofoga Fetalai lea na saunoa nei, e pei e maua foi o le taimi lea o le sui fofoga fetalai, lea na loka ai isi sui usufono o le Palemene. E pei o latou ia sa i ai i le taimi lena, pe i e le faaaloalogia foi

i taitai o le atunu sa i ai i lena taimi. Ae pei o latou nei o lea sa...e tatau foi ona faaaloalo i Taitai o le atunu.

**Tofa Nafoitoa Talaimanu Keti:** Lau Afioga i le Fofoga Fetalai, pei ua le fia faasao ua le fia faamalamalama, ae pei ua fia atamai ea le mea lea ua sau. Po o le a se finagalo o lau Afioga ae taoto ese ia mea o la ua faafogfa mai i le insure na lauga ai, ma le faaaloalo.

**FOFOGA FETALAI:** Faafetai, o mea lava e le i laga e sui mamalu ia latou saunoaga faalauaitele, aua le toe tali i ai, ae sao le sui usufono mo Vaimauga, leaga sa taua e le sui mamalu o Vaimauga le insure. O lea ua saunoa malamalamalama le Palemia, lafo maia o outou finagalo. O lona uiga ua uma atoatoa saunoaga a sui mamalu, o lea ua tali le Palemia, ua ta-aofai uma lava. O le faapuupuu foi lea ma le fesoasoani i le Minisita o Tupe maua ma faalepuipui, ua uma foi le tele o lau galuega, ae saunoa mai.

**Susuga Hon Tuilaepa Auelua Fatialofa Luplesoliai Neioti Aiono Galumalemana Dr. Sailele Maleilegaoi:** O lea faatoa ou tau i le lipoti lea o le faamatalaga o tupe alu a le Matagaluega o Leoleo i le tausaga na tea nei. O lea e faapea mai ai e \$22 miliona \$200,000 tupe faavae e pei ona taua atu i luga, ua auiliili atu i lalo lona faaaogaina. O le \$16.9 miliona sa fuafua mo totogi o le aufaigaluega, le aufaigaluega a leoleo. E faapea alauni ma benefiti e agavaa i ai. Ae peitai e le i mafai ona faaaogaina uma nei tupe ona o le toatele o le aufaigaluega faamavae faapea avanoa le faatumuina. Lau Afioga i le Fofoga Fetalai, o le tulaga lena, o le \$16.9 miliona tusa e \$17 miliona, lea sa faatino i le tausaga le la talu ai. Lea na ou taua atu ai, ua uma ona fai isi siitaga ae pei o si vaega laititi lava lea e mafua ai ona tatou vevesi, lea foi ua faamalamalama atu e le Minisita.

**FOFOGA FETALAI:** Malo faafetai. Se i tulai mai le Minisita.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai. Faafetai foi i sui usufono ia na fai a latou lauga faalauaitele, ae leai ma se lauga i le taimi na lauga ai lau Afioga ae faafetai. O le taimi lenei i leoleo ua 17 vaiaso o fai aoga ona fai lea o suega pasi. O le 3 vaiaso talu ai na fai ai le recruit mulimuli lava, e 50 na amata ai e uma atu le 17 vaiaso toe 44 ea la e totoe. O lea na fai le latou faauuga, o le latou faauuga i le taimi na faauu ai, ae 17 vaiaso. O lona uiga ua tutusa uma le atamamai o leoleo o lea o le a recruit i lea taimi ma lea taimi. A uma foi le Police Academy la e i uta, o le a aoga lea mo leoleo, o le au securities o le au leoleo falepuipui. O a lava aoaoga o le a mafai ona fai, e maua ai le tomai i le galuega faa- leoleo ma leoleo falepuipui, ona tutusa ai lea o level o atamai. Ae o le tulaga i le faaiuga a le Tribunal lea na fai i totogi, lea ua

taatia se i uma, se i pasia le Tala o le tupe a le Ofisa o le Tupe ma le Matagaluega, e toe talanoa i ai ma faatino. O le tali atu lena i le tele o faaupuga na lafo mai.

O le faaaupegaina o leoleo masalo e le mafai ona fai, ia au lava ia o le Minisita e le mafai ona fai. E pau lava le taimi e faaaupega ai leoleo pe a o se raid i toga mariuana po o fale o e o masalomia o lo o fau ai le aisa e pei ona saunoa nisi o sui usufono. A o lea faaaupegaina e saini le Loia Sili a le Malo, ona ou saini ai lea o le Minisita, e toa 2 i maua e saini le warrant ona faatoa mafai lea ona faaaupega ia malu o le Malo. E saini le warrant ma le alofa i le fatu, pe tua ma ni a le galuega a malu o le Malo o le a o e fai. Tatou te faafetai i le Atua, e leai lava se mea o tupu mai. A o le tele o le aoga o raid ia a leoleo, ua tau aveese atu ai i isi nuu, le uiga lea o le taupulepule tutu o tagata nei. Ana leai le malosiaga lea o le Ofisa o malu o le Malo, a o le risk la e i ai e matua tele. E pei ona fai atu e saini le warrant ma sainia faatasi lava ma le o lo o vaaia le Ofisa o le loia sili le warrant muamua, faatoa saini lena o ia, faatoa ou saini foi lena. Ma talanoa, sole e saini lenei mea ma lo ta fatu e tumu i le alofa i le Komesina ma le vaega lea faapitoa i le Ofisa o leoleo. Ia faamalo galue, e sau aso e talanoa ai tagata i le tou galuega fai. E uma foi lo matou taimi tausaga lea, ae tumau galuega o lo o faamaumau i le Ofisa o Leoleo aemaise foi o le Falepuipui ma mea e tutupu ai. Lau Afioga, o le tele o isi mataupu nei ae o le a faapuupuu atu.

O le Falepuipui i Oloamanu, o latou ia o lo o gafa ma le faamamaina o le taulaga ma luma Maota o le Palemene lenei, fanua atoa lava o le Palemene, ma o i le Ofisa o Faamsinoga. O lea foi ua oo le latou tautua, i le talosaga na aumai, nofoaga o tagata matutua i Vailele. Ua oo i ai le tautua a le Vaega lea i Oloamanu. O le latou galuega lena o lo o feagai ma latou, ma le fofoga taumafa o le Falepuipui. O Savaii i Vaiaata o le nofoaga lea, o le a lava le mea e fai ma e o lo o i ai, o le latou matafaioi o faatoaga, ina ia lava pea le fofoga taumafai o le Falepuipui. E le o mafai e le tupe maua a le tatou... i tausaga taitasi le budget ona faamalieina ai le fofoga taumafa o le falepuipui. E agai i luga tagata nofosala e 400 ma ona tupu le tausaga lenei, faatasi ai ma le au remand. E 400 e oo i le au remand ua 100 ma ona tupu, 120, ua tumu uma foi ia potu e 2 la sa fuafua mo i latou ia. Ae e taumamafa uma... o latou foi o ave i Savaii e low risk, ona e faamoemoe ia i latou le fofoga taumafa o le tatou Falepuipui. O le tausaga na tea nei i tupe maua, faamalo atu i le Komesina, \$950,000. E faatoa oo lea o se tupe maua a le Matagaluega, le tausaga lea na tea atu nei, e \$950,000. I sala ia e maua mai i le aualatele o galuega faatino, o a uma ni, ua oo i le tausaga lenei, o lea o le a aumai taavale e laisene ma laisene. O lea e faamoemoe e \$15 miliona le tupe e maua mai i taavale.

O le tulaga foi na saunoa mai nisi i le ave i o i Fagalii le pasiga taavale. E leai, o le pasiga taavale lava ia e ave i Vaitele, i le vaega lea o lo o pasi ai i le taimi lenei, o le a to mai i le Matagaluega o Leoleo le fasi fanua lea e tu

ai le Ofisa lea o le LTA sa i ai mo le pasiga taavale. O nisi faapea e le o lelei le pasiga o pasi. Ou te tautino atu, o la e lelei le pasiga o pasi i le taimi lenei e fua i le leai o ni pasi e molia mai i le Ofisa o leoleo i luga o le aualatele. O lona uiga o lo o lelei le faatinoina o le galuega a le LTA, i le pasiaina o taavale aemaise taavale laupasese, o pasi, vans taxis ma le atunu lautele, ona e sea sea molia. O lona uiga e le o tele ni faaletonu o i ai. E pei o le tala atu lena ma le tele o mataupu sa laga mai...

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai, e maua sina avanoa. Ona o lea e matau atu o lea o le a faaiui le saunoaga a le Minisita, masalo o le vaega foi lea e vaaia le tatou Matagaluega, le Tulafono foi lea o le Cyber Bullying ia po o le tatou Cyber Security, ona e pei e foliga o le tatou Tulafono lea sa tatou talanoa i ai, e pei sa lilifa agai i le tulaga foi lea faatekonolosi i luga o le internet. Ae pe mafai ona tagai ifo po o le a se vaega o lo o fai e le Matagaluega? Se i tau puipui mai ai ia faasalalauga lea e fai i luga o le TV.

Aua e le na ma le laina, o lea ua oo lava i luga o ala ata, i le tatou atunu, o lea ua fai mai ai le taufaaleaga. Ua le gata la i tagata taitoatasi, ae o lea ua faaleaga ia Ekalesia. Ae o lea ua tuusao mai lava i Ekalesia, ia ona lauga fua lea ma faaleaga isi Ekalesia, ae ua le focus ia i lana Ekalesia o la e aoao ai. E pei e foliga e le atagia ai le kerisiano i i lea ituaiga tapuaiga, ona o latou aoaoga ma lauga e fai, ma lou agaga faaaloalo.

**FOFOGA FETALAI:** Ua ou matua atu, e sao ia le sui usufono mamalu o Falealili, ae ua fai si ou televave o lea o le a oo i ai le faamalamalamaga a le Minisita. Ioe ae se i outou onosai mai, ioe vaai se meamanu ua uma ona faamalamalama ia le vaega lea ua e saunoa i ai. Se i tulai mai ae sao le sui usufono o Falealili, se i e silasila i nei amioga a faifeau lea ua tulai mai.

Ia se i tulai mai le Minisita.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, atonu o mea ia e alu atu i se fautuaga lautele e le o maua e au faamaumauga. Ae i le mataupu lea e leo po se lilo i le... tatou uma lava... i faasalalauga lea ua sau e faaaoga ai le TV ma faaaoga ai le Tulafono foi lea o le freedom of speech.

Ae i lau vaai i ai ma le ua fai si ova. O le a tagatagai i ai ia le Ofisa o Leoleo po o le a le tulaga i ai i Tulafono. E le mafai lava ona alu le Ofisa o Leoleo i fafo atu o le Tulafono. A fai mai le Tulafono seiloga e alu atu se faitioga, faatoa gaoioi le Ofisa o Leoleo. Ia alu atu nei e faaulu lau faitioga, ina ia mafai ai ona gaoioi le Komesina ma le Ofisa o Leoleo, e le mafai ona o, te i lava ua o fai. E manaomia le faitioga, e oo atu i le Ofisa, ona faatino loa lea o le galuega lea.

Ae o lea e tatou te faalogologo i ai, ua ova. Ua ova atu ma le talaiga o le Talalelei, e talai lava le Talalelei ma le fatu o le ituaiga ia ma le latou Ekalesia. Aua le lotea fua isi tapuaiga. Ae o le a tilotilo i ai le Matagaluega.

**FOFOGA FETALAI:** Ia se i tautuana ifo, leaga e... ia o le a tau toe atu foi e... o lena e tou te faafogofoga i ai. Ua sau le le mafaufau.

**Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai...

**FOFOGA FETALAI:** Ia se i tulai mai le Palemia.

**Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Masalo e le mama le mataupu lenei. Aemaise ua lafo mai foi ni upu i le faaiuga a le atunu, na tofia ai sui usufono o le Palemene lenei. Ma e ua ova atu ma le tulaga e tatau ona fai i ai ia se faaiuga.

O le mataupu lenei lau Afioga i le Fofoga Fetalai, ua oo mai ia te au ia faitioga. Ma o le tuuaia o le tofia o le Taitai o le Malo e se isi Pulega mai fafo, o se tuuaiga e faavevesi Malo, o se tuuaiga ua vaai maualalo ai, ma taufaifai i le atunu lenei o Samoa, ma lona Malo Tutoatasi.

O le tulaga lea tau i le faaaogaina o mea nei o faasalalauga mai se TV, ma le faamatuu atu o le TV lenei a le Malo i tua, o se uiga lelei na faavae ai. O se uiga lelei na fanau mai i le Privatization Policy a lo tatou Malo. E tuu atu ai i tua pisinisi a le Malo, e faagaioi professionally, e i latou o i ai le tomai, ona e i ai foi ni manatu sa lafoai i le Malo e le gata o Samoa ae o atunu foi i fafo.

O le mea lenei o le faiga o pisinisi, e matua le taitai ona agavaa ai le Malo e fai ni pisinisi. E tatau lava ona tuu pisinisi latou i le aufaipisinisi. Aisea? Aua foi e popoto latou i le faiga o pisinisi. A gau loa faatetea uma lava. E na ona pio lava o le tagata, tu ai ma le tao se i tulou. A o pisinisi la a le Malo, e tiga lava e i ai mo mea o auala pe 4 masina, 2 tausaga o la e toso lava, toso lava ona e i ai lea Tulafono ma lea Tulafono e puipuia ai le aiatatau a tagata.

Ae o mea e tau o pisinisi e pule ai lava ia le tagata e ona le pisinisi. E na ona e sipa lava, tuli ma oe. E leai lava ni upu e hire na o tagata lelei ae afai foi o tagata o i ai e le atoatoa e tuli ai lava i le taimi lena ae hire mai tagata lelei. E leai lava ma se isi e faalavelave, tuu mai loa i le Malo, e tasi lena o faafitaui e ala ai ona gau lea pisinisi a le Malo ona o le tele o mau Tulafono e puipuia ai le aiatatau a le tagata piopio. E tuai ai ona faagasolo ia iuga vave e tatau ona fai. Ave i le Faamasinoga ona o lea Tulafono ma lea Tulafono, ae o le pisinisi a le tagata fai pisinisi, e leai lava nisi. O ia lava e pulea, e na ona e pio lava, fafo loa ma le maafala, e leai lava ma se talanoaga e faia.

O le ala lena na fanau mai ai le manatu, ua mulimuli uma ai atunu o le lalolagi e tau faamatuu ese mea ia, tuutuu atu i tua, fai e latou i tua. E i ai la taimi e tuu ai isi pisinisi taofi isi, ona e i ai le mafuaaga, o le mafuaaga e tele lava le service e aoga i tagata, ma e le gafatia foi e le Private Sector ona tauave e pei la o le tatou vaalele. E pei o le falemai, pei o aoga. O isi atunu e leai ni aoga foi lea e leai ni falemai e faia e Malo, e fai uma lava faapisinisi. O le mea lena e toatele ai ia tagata ia e maliliu i Amerika, ona a e mai, a leai sau inisiua, leai sau tupe e le togafitia oe. Leaga e pisinisi uma lava mea uma.

O atunu la e pei o tatou e leai o lea e fai lava e le Malo. Po o le a le gau, ae fai lava ona o le tautua i o tatou tagata. O le ala lena o lea e faamatuu atu ai lea pisinisi i tua i lalo o le Privatization Policy, i le agaga e o ane ia latou lea sa faafoea le TV Samoa. E o ifo latou e faagaoioi le pisinisi, ia ma talia le tau na latou ofo mai ai e faagaoioi. I lou taofi, sa tatau ona o atu latou ua masani i Faiga Faavae a le Malo e ave i ai le tofamamao, e silasila ai ina ia faaauau ai le faaeteetega lea, le faaeteetega lea sa i ai. Ia matua mataitu lelei i latou e faatupuina le loto leaga, faatupuina le feainai.

O le ala foi lena o lea sa faatu ai se Council faapitoa, fono faapitoa a le autusitala ina ia tilotilo latou i mea ia e pulea e latou. Ae o le a le mea lea e i ai? O isi tagata e i ai i totonu i o lea foi e molia i le piopio. E le mafai la ona nofonofo le Malo, i le tulaga o le tutupu mai o mea nei ae nofonofo pea le Malo, ona o mea tonu ia o lea e liolio i ai lo tatou Malo, liolio i ai le Faavae o le Malo o Samoa.

E lelei le agaga na faamatuu atu ai, taumafai lo tatou Malo, ina ia matua atiae ia fesootaiga televavave. Ae o lea ua silafia e le Maota nei, ia le mea ua tupu i fesootaiga nei televavave, ua faaaaoga e le toatele. E faasosolo ai le loto leaga i le lalolagi atoa lea na mafai ai ona faatu le faigamalo lea o le ISIS, i totonu o Sasae tutotonu. O le latou mau, fasioti tagata, fasioti tagata e le fiafia i ai. Ia ona faasalalau loa la lea i le internet, i le lalolagi atoa ma o atu ai tagata e faapea foi mafaufau.

Sa tau le amanaia tele e Niu Sila ma Ausetalia i luga o le tulaga lea o le aiatatau faaaliali ai, faasilasila ai ou mafaufauga. Ae na tutupu loa le mea na tupu i Kalaiasetete la ua fau le Tulafono, e faasaga tonu lava i uiga ia o le faaaaoga o le media e fai ai ni talaiga faaloto leaga tagata, faatupu ai se vevesi i se atunu filemu.

Lau Afioga i le Fofoga Fetalai e le mama itu ia ma o le a ou tapa ai le fautuaga a le Loia Sili. Aisea? Leaga ua uma ona faataoto faaiuga faalefaamsinoga, e tapu ai uiga faapea. Faamsinoga lea na molia ai e Tofilau Eti Alesana le Palemia o Samoa, ma le maoae o faaleaga, ma le faaleagaina o lona igoa e le Observer. O i ina i le Faamsinoga lena, na faataoto ma faamanino mai ai, le mea lea o le aiatatau faaali saoloto o mafaufauga, le saolotoga o free expression, the right of freedom of expression.

Na matua faataoto mai i le iuga lena le faaiuga faa-faamasinoga. E leai sou absolute right of freedom of expression. Leai lava ma sou saolotoga i lalo o le Faavae e fai ai ni au faasalalauga saoloto e i ai tapu. O le a tapu? Ona o le tulaga lenei i le atunu o Samoa, e te faaleagaina loa se tagata, ua e fasiotia. Ma e sili atu ona matuia le fasioti o le isi tagata i ona talitonuga, ma lana amio, nai lo o le fasiotia o le tagata, faauma lona ola. Character assassination is worst than murder, aisea? Aua e soifua pea le tagata ae sosolo i lana fanau, ma fanau a lana fanau le mataga, le luma e faalumalumaina.

Lau Afioga i le Fofoga Fetalai, o le iuga lena, ae e sili atu le matautia i le aganuu lenei o Samoa, le mataga o le igoa o se tagata. O lea la na faataoto ai loa le iuga lea, e mafafia le iuga ma e aoga i loia nei e tutu i tua e faaoso tagata e faitau ai i le iuga lea. Leaga o le iuga lena, e afua mai i le Faavae. E afua mai i le Faavae o le Malo o Samoa.

A e manatu loa o le a faaaoga lau aiatatau, e faaali ai ou manatu e faaleaga ai se uso a tagata, ona e nofo sauni lea e te fetoi ma le Tulafono. O le ala la lena o i ina i le vaipanoa lena, o le a ou tapa ai ia se fautuaga mai i le Ofisa o le Loia Sili i le latou galuega lena. O le puipuia o le atunu lenei, mai i se tulaga e ono vevesi ai Samoa, e i ai lava le moemoenoa ma le laufa le aina, e ono tuai atu leoleo.

Ae oo loa i mea tau Ekalesia, talitonuga faakerisiano, e vave tele le reaction a tagata. E oo mai nei o la e tau taofiofi lava le vevesi. Ua ova i le 700 tausaga o fefasai tagata o Aealani, Aealani, i taua i le va o tagata Katoliko ma tagata Porotesano. E matautia le mea, le mea lea o le faatupu o le vevesi e afua mai i talitonuga. Ua fiu foi taitai o Ekalesia i le itu o Porotesano ma le itu o Katoliko e taofiofi ma talai atu le Talalelei o tagata uma o uso o le talaiga o le Talalelei. Ua matua pogisa lava tagata.

Ae o tagata foi o lea e faia mea nei, e na ona tau o tagata lotu ae e le o toe o i ni lotu. Pogisa mafaufau o lea ua galue ai i i le tiapolo. O le tiapolo foi ia e poto tele le tiapolo i le Fegaiga Tuai ma le Feagaiga Fou. E matua poto lava ia le tiapolo, ona ia liliu loa lea, i talaiga ia e uunai ai tagata e fai ana talaiga. E faaaoga ai le Suafa o le Atua. Ae o lea matilatila lava, ia commandments, poloaiga a le Atua. O le a? Poloaiga e 3 muamua, poloaiga ia e alofa i le Atua. Poloaiga e 4 e oo i le 10, alofa i lou uso a tagata aua a e alofa i lou uso a tagata, e te alu tau faaleaga. E te le alu tau faaleaga o ou neighbours uma tagata na.

Lau Afioga i le Fofoga Fetalai, o le faifeau lea, e matua le malamalama. Ua na filifilia si mea e matua laitiiti lava, ae galo ai, o le autu atoa o le talaiga o le Feagaiga Tuai ma le Feagaiga Fou, o le auau atoa lau Afioga i le Fofoga Fetalai, o le alofa. O le alofa, e faatino i le auina mai o le Alo o le Atua e toatas, ina ia maliu mo tatou uma. Ae faavae i le Alofa.

Lau Afioga i le Fofoga Fetalai, o se mea matautia i se Taitai o se Ekalesia, ona laaloa lana vaai i poloaiga ia a le Atua, ia e alofa. Ae o le faaleagaga lea na aumai i i, o ai le Ekalesia Katoliko? O ai le Mamona? O lea ua uma ona

fai i ai... leiloa po o taeao, tala atu taeao sau le Taiti sau le Metotisi. O le matua faatupu faalavelave, small knowledge is extremely dangerous knowledge. Ma e soo se mea faapea e faaaoga le Suafa o le Atua, e fai mai ai ni talaiga sese o lea e tu ai tua ia le tiapolo.

E faapea ona e tu e faapefea ona e tu tu mai i luma? Ae se i fesili, fesili o anafea na faatu ai lau Ekalesia? O nei lava ananafi, nei lava ananafi ina ua o ese ma le Ekalesia Aso Fitu Autu. O ese nei lava ananafi, ina ua o ese ma le Ekalesia Aso Fitu Autu. O lou talitonuga o lea e i totonu o le Ekalesia Aso Fitu Autu i le mafutaga a Ekalesia. Ae o lea e le matua le malamalama ia lenei faifeau o le fatu atoa lea o le talaiga a Iesu, o le alofa e te le faaleaga ai se isi ou uso a tagata.

Lau Afioga i le Fofoga Fetalai, o le tulaga lena, o tatou uma lava lau Afioga i le Fofoga Fetalai, o tatou uma lava ua fesautai ia o tatou gafa. O au ma lou aiga, e i ai uma lava Ekalesia. Aso Fitu Autu, Aso Fitu lea ua o ese, faatoa o ese nei lava ananafi. Masalo e le i atoa le 10 tausaga. E tetee i le Aso Fitu Autu. E i ai Katoliko, e i ai Mamona, e i ai ia AOG ma ona lala. E i ai uma lava ia Ekalesia i Samoa i totonu o lou aiga. Ae e fealofani uma lava, fealofani uma e leai se faaleaga e le isi e le isi.

O le a le mea lea e fai e le faifeau lea? Ua galo ia te ia le mea lena. O lea ua aofia uma lava ia le atunu atoa. Aua e tofu lava tatou ma a tatou fanau, o fanau a fanau, o tatou uso ma o tatou tuafafine o la ua lolotu i isi Ekalesia. O le faaleaga la e le faifeau lea, e leai se mafaufau. Ua nofo lava ia ma faaleaga uma le atunu atoa. O le mea lena e le i oo i ai, mo le mea o le mafaufau o le tagata ua tiapoloa. Ua tiapoloa le mafaufau ae tutu mai i luma. Fesoasoani ai ma le TV1.

O le mea nei o Tulafono, e lavea le tagata e ana le mataupu, toe lavea ma le auala na faasau ai se tuuaiga sese. Ma o lea ua taoto faaiuga o Faamasinoga, e ono tagofia ai le mataupu lenei.

Lau Afioga i le Fofoga Fetalai, e tatou te le toe fia oo i ai. Ua o tatou foi mai ai, foi mai i le lalolagi o kerisiano. A lea na sii taua ai ia kerisiano o le lalolagi i le mea na mafua ai le taua lea e taua o le Crusaders. Ua lagolago uma ia kerisiano uma, Ekalesia eseese e o i Jerusalema. E tutuli ese Mosalema, Mosalema faatoa faatu i le tausaga e 600, ae na faatu mai o latou talitonuga i le Feagaiga Tuai.

A silasila se isi i le Tusi Paia a le Mosalema, o le Feagaiga Tuai ma faasalaga o le Feagaiga Tuai, o le maka i le maka, o le nifo i le nifo. O lea la e faatino lava e tau mai i le taimi lenei e nisi o atunu o lo o i ai ia le Ekalesia Mosalema i le tulaga ua pulea ia latou faigamalo.

Samoa o le atunu kerisiano, ma o le Nofoaiga lenei, lea na tuuina i totonu o le fatu o le Faavae o le Malo o Samoa, ia upu ia e Faavae i le Atua Samoa. O le tulaga maualuga lena e tu maualuga ai, ma o le kerisiano i le kerisiano e na te manatua. O le auau o le talaiga Kerisiano, o le fealofani. O toe upu lava lena a lo tatou Alii ona Afio ai lea i le Lagi, '*Ia outou fealofani*'.

Ae o soo se isi lava e lauga e faatupu ai le vevesi i va o Eklesia, e le o se kerisiano. E tau mai ai i ina, o le anti keriso, antichrist. Ma e sa lapatai mai foi tatou e lo tatou Alii, ia tatou faautagia, o le a tulai mai le anoano o le mau anti keriso, e folau ma talai le Suafa o le tatou Alii, ae ese le mea lea e sau ai.

Lau Afioga i le Fofoga Fetalai, ou te faamalulu ia i latou o aafia i lenei mataupu. Ma e ou te faamoemoe, o le a tilotilo mata o i latou ia e pulea le TV lea. Aua le manao tele i tupe, o tupe lava ia e aafia ai, ia le Faamsinoga tonu. Ae ia silasila i le tautua e tatau ona fai e le TV. O mea ia e vaai ai le Pule, e vaai ai mata o le Pule. O taimi uma o faasalalauga e sau pe ono taufaaleaga le faasalalauga, ona fai lea o le latou galuega e tatau ona fai.

Lau Afioga i le Fofoga Fetalai, taatia maia le mataupu. E taua tele le mataupu ua laga, ae e leaga e laga loa i totonu o le Palemene lenei, e le tatau ona laaloa ai le vaai. E i ai ia le tatou Faavae. Faavae e lagolagoina ai tapuaiga. Ae o totonu lava foi o le Faavae lea, o lea foi e aumai ai lapataiga, i le tulaga o e faavevesia le atunu.

O la ua matala mata o le Malo o Niu Sila, i ituaiga faiga nei, pasi ai a latou Tulafono, ma o Niu Sila o le isi lea atunu e open tele ia latou Faigamalo. Ae o lea ua amata ona tilotilo totoa, i tulaga o aiatatau nei, aiatatau faatupu vevesi, toatele tagata na maliliu ai, ona o tagata faatupu vevesi. Tagata ua taina mafaufau, taina i ituaiga talaga ia.

Lau Afioga i le Fofoga Fetalai, e leai se aoga e fai ai se Fono a Samoa, ae e le silasila i mea na faatutupu mai ai le vevesi i le nofo filemu, o le atunu lenei. O lea ua aumai le mataupu i totonu o le Fono sili a le atunu, ma e le tatau ona laaloa ai le vaai.

Lau Afioga i le Fofoga Fetalai, faamalie atu i le sui usufono o le a taatia mai le mataupu, ae faamalo le lototele i le laga, i totonu o le Fono Aoao Faitulafono.

**FOFOGA FETALAI:** Malo, faafetai. O le ala foi lena o le taumafai atu i lau Afioga i le Minisita, ia o Leoleo ma Falepuipui aemaise foi o Tupe Maua, e silasila totoa i ai le Malo. O lea ua malele ma saunoa ia le Afioga i le Palemia, ia e amata mea le Malo i se taofiofiga, o ni mea e ono faatupu ai le vevesi i totonu o le atunu.

O le mea la lea, malo faafetai. Ia, taoto atu i le Malo, se i outou silasila aua e.. o ai e amata mea? E amata mea le Malo i le tausiga o le filemu. Ia tulai mai lau Afioga i le Minisita o Tupe Maua e faaaauau le saunoaga.

**Afioga Hon TIALAVEA FEA LENIU TIONISIO HUNT:** Ia, faafetai i lau Afioga i le Fofoga Fetalai. Faafetai foi i le Afioga i le Palemia mo le faamalamalamaina o le mataupu lea e uiga i le faasalalauga nei na fai.

Lau Afioga i le Fofoga Fetalai, ia e talitonu ua oo mai i le isi Matagaluega o lo o ou tauaveina, le Matagaluega lea o Tiute ma Tupe Maua. Ma e tusa ai

ma au faamaumauga, o a outou mataupu na laga, o nisi nei o mataupu sa fesiligia ma laga e nisi o sui usufono mammalu.

Muamua o le mataupu e faasaga i le olioli, lua, metotia faaeletoroni mo le mataituna o lafoga, TIMS. Aemaise pisinisi o supermarket ma faleoloa laiti. Tulafono mo Investment Tax Credit, e unaia ai le fausia o ni faletalimalo lelei, ma le manaia Five Star mo turisi ua faamuta i le Aso 30 o Iuni 2018, aemaise le lafoga o le Capital Gains Tax e tusa ma suiga o le Tulafono o le 2017.

Ao le i tali atu i mataupu taitasi nei, e manatu e ao ona tuuina atu vaaiga taulai, o faamoemoega autu o le Matagaluega e pei ona i ai ana fuafuaga alualu mamaao, i ni vaega se tolu. O fuafuaga autasi Corporal Plan, 2017 – 2022. O fuafuaga alualu mamaao o taiala o auaunaga. I lalo o nei fuafuaga alualu mamaao, o lo o manino ai le vaaiga taulai, vision a le Matagaluega, ia galulue faatasi mo se Samoa saogalemu, ma le manuia faapea ma lana manulauti, ina ia nafa taulimaina le atinae e ala i le lelei atoatoa o le aoina o tupe maua ma siitia le usitaia o Tulafono, ma se tuaoi faavaomalo e malosi lona puipuiga.

O le faa-naunautaiga o le Matagaluega mo le lumanai, ia mafai ona faataunuu e ana paaga, a latou matafaioi, o le Tulafono o le loto fuatiaifo, voluntry compliance, e faafaigofie i fesoasoani a le Matagaluega. Ia faatupulaia le silafia o tagatanuu, o le totogiina o lafoga ma tiute o lo latou sao tele lea mo le atunu atoa. Ua talitonuina e le Malo le tulaga lelei atoatoa, o le faafoeina lelei o fefaatauaiga i totonu o le atunu, faapea ma le puleaina lelei, ma le malupuipuia o faamaumauga ma faamatalaga tau lafoga. Ia silafia e nuu ma afioaga le taua o le malupuipuia lelei o latou tuaoi faava o malo, i o latou soifuaga i aso uma. Ia talitonu nuu ma afioaga, e i ai aiaiga talafeagai ma faaletulafono e tulituliloaina ai latou, o e e le tausia le Tulafono. Ia talitonu nuu ma afioaga o le aufaigaluega o le Matagaluega e lava le tomai, silafia, faamaoni ma le agaga fesoasoani i le faatinoina o latou tiute. Ia aloaia faava o Malo auala talafeagai faaletulafono o lo o faafoeina ai le fefaatauaiga ma le faamalosi o puipuiga i tuaoi faava o Malo. Ina ia ausia uma nei vaaiga taulai ma lana manulauti, e 5 ni taiala tumaoti ua faataatitia e le Matagaluega aua ana matafaioi. Ia lelei le auaunaga ma paaga faapea ma le faafoeina o le tausisa o Tulafono. Toe fuataiina le aoina o tupe maua i faiga faaonaponei. Lelei le faafoeina o fefaatauaiga ma le puipuiga i tuaoi faava o Malo, faafoeina lelei o suesuega faaauau ma le faamalosia o Tulafono. Faaleleia punaoa faale-galuega faatasi ai ma agavaa, ina ia siitia tomai faapitoa e to ai faataitaiga o le aufaigaluega.

Ona o ia fuafuaga mamaao a le Malo faapea lenei Matagaluega ua mafua ai ona tapena ma faataatitia ana polokalame mo lea tausaga ma lea tausaga ina ia mautinoa e tuuina atu se auaunaga lelei, faamaoni, le faaituau, atoatoa, manino, faaaloalo, fetalai ma le faatuatuaina aua le aoina o tupe maua a le Malo, kilia vave oloa i tagata malaga mai i totonu o Samoa ma puipuia tatou

tuaoi faava o Malo mai le auina mai i totonu o Samoa o oloa faasaina faatupu faalavelave. O nisi nei o polokalame e i ai le taavale masini faata mo pusaoloa, medical with container x-ray scanner, ma o lo o faatupe i lalo o le fesoasoani a le Faletupe o Asia o lo o tuuina mai i le Malo mo le faaleleia o lana uafu faava o Malo i Matautu. O lenei masini o le a fesoasoani tele i le Ofisa o Tiute mo le siakiina o pusaoloa e auina mai totonu o Samoa po o sao oloa o lo o faapea ona faapepa ma faalisiti mai faamaumauga e tuuina mai i le Matagaluega e faatino ai latou siaki, iloiloga ma suesuega. A tutusa pepa faamaumau ma foliga vaaia i luga o le faata, o lea faapea ona vave le kiliaina o oloa. A vave le kiliaina o oloa, e vave ona maua oloa e faatau atu i le mamalu o le atunu, vave ona maua tupe a pisinisi, vave foi ona maua tupe a le Malo e ala i tiute ma lafoga totogi mai, vave foi ona faatino fuafuaga ma galuega a le Malo aua auaunaga lautele mo tagata uma. I le taimi nei, o lo o faatino lava le siaki o pusaoloa e le Matagaluega i le vaai ma le suesue o oloa i totonu o pusaoloa mo le aso atoa pe lua foi aso ona faatoa mafai lea ona kilia. Ma o lo o i ai se tuuaiga ma se faafitauli tele o lo o faapea ona tele ai faitioga i le faiga o le siakiina o nei pusaoloa, ae ona o le naunautaiga o le ofisa ina ia sao le siakiina ma aua ne i i ai ni oloa ese e nana mai faatasi ma oloa o lo o lisiina, declare, o le isi lea mafuaaga o le tuai. Ae a taunuu mai loa lenei masini faata mo pusaoloa, e le taumate o le a vave le auaunaga.

O isi polokalame sa faatino lava ona o le vaaiga taulai ma le manulauti, o le faamanino ma faaleleia lea o nisi o Tulafono ma Tulafono Faatonutonu mo le faafoeina o matafaioi ma galuega a le Matagaluega. Tulafono o Lafoga 1974, ua suia nei i le Tulafono o Lafoga 2012. Tulafono o Tiute 1977 ua suia nei i le Tulafono o Tiute 2014. Tulafono mo Lafoga Faaopoopo i Luga o le Tau o Oloa ma Auaunaga 1993/1994 ua suia i le Tulafono o le VAGST 2015. Suia le Kalifa mo Tiute mai le 2012 i le Kalifa fou o le 2017. Siitia ma faalelei polokalame computer o lo o faaaoga e le Matagaluega e faatino ai galuega ina ia vave ma sao le aoina o lafoga ma tiute. O lo o i ai le ASYCUDA faapea le auaunaga faa-eletoroni mo lafoga po o le Samoa Electronic Tax Service po o le Samoa E-Tax, o le vaega lea o le system a le Ofisa o Lafoga e mafai ai ona resitala le pisinisi totogi lafoga e fai mai ai ana tax return...

**FOFOGA FETALAI:** Ou te faauilavea i le saunoaga a le sui usufono ona talu ai o lea ua tatou toai taunuu i le tatou malologa. E faamalulu atu, o le a faataatiae Galuega le Fono Aoao mo lana malologa masani.

*Na faataatiae Galuega a le Fono Aoao mo lana malologa masani i le itula e 10:45 i le taeao ma toe faaauau i le itula e 11:30 i le taeao.*

*Na toe faaauau felafolafoaiga i luga o le faiatauga faalua o le Tulafono Tau Faaofi o le Faatatuina o Tupe Faaopoopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.*

**FOFOGA FETALAI:** Ou te faasila atu ua toe amatalia Taualumaga ma Galuega a le Fono Aoao Faitulafono. E faia le galuega o saunoa le Afioga i le Minisita mo Tupe Maua e faapea foi Leoleo ma Falepuipui.

Ou te tapa lau Afioga i le Minisita e tulai mai e faaauau le saunoaga.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai. E talitonu foi ua saoialo le taumafataga o le aoauli aua se sailiga malosi i lau Afioga aemaise o le mamalu o le Palemene. O lenei auaunaga ua matauina lona aoga tele mo lenei vaitau o le Koviti-19 aua e le toe fealuai ai fua le tagata ma sefe ai foi lona taimi ma le tupe mo le penisini, car park faapea ma le kiu a le kesia e totogi ai lafoga. O le polokalame po o le metotia faa-eletoroni mo le matauina o lafoga, tax invoice monitoring system o lo o faatinoina e le Matagaluega e faaaoga ai auala faatekonolosi ma fesootaiga faaneionapo e fesoasoani i le mataituna ma le aoina o lafoga i luga o fefaaatauaiga o oloa ma auaunaga totogi. O lea polokalame e maua ai e le Matagaluega fuainumera o tupe maua a le pisinisi i le taimi lava e faatino ai fefaaatauaiga, ma e faaaoga ai le internet po o nisi electronic devices e pue ma lafo ai ia faamaumauga i le server a le Ofisa o Lafoga. A oo la i le taimi e tuuina mai ai pepa o lafoga, o lea piriota ma lea piriota, o le a mafai loa ona faatusatusa fuainumera na maua mai i le TIMS ma fuainumera e tuuina atu i le pepa lafoga. A tutusa, lelei tele, ae a eseese, ua toe faasao e le Matagaluega ma tuu i ai le faasalaga e aua ai ne i toe tupu sea feeseseaiga. A o le mea taua, ia sao ma tutusa lafoga e tatau ona totogi maim o le Malo.

Ona o nei la fuafuaga faataatitia o polokalame ma taiala ua matauina ai le agai i luma o tupe maua ua aoina e le Matagaluega. I le tausaga 2015/2016, o le tupe na fuafuaina e aoina, e \$479.1 miliona, o tupe na maua e \$485.1 miliona. E \$6 miliona na faasili ai. O le 2016/2017 o le tupe na tuu e aoina, e \$491.8 miliona, o le tupe na maua e \$498.2 miliona, e \$6.4 miliona na faasili ai. A o le tupe na maua i le isi tausaga i le isi tausaga pe a faatusatusa i ai le tupe na ao, e \$19.5 miliona.

I le tausaga 2017/2018, o le tupe na fuafuaina e ao e \$522.4 miliona, o le tupe na maua e \$507.6 miliona, \$14.8 miliona na pau ai i le tausaga lea e le i maua. Ae ui i le pau o le tausaga lea e le i maua le saofaga na tuu e ao, a o le tupe faasili i le isi tausaga i le isi tausaga e \$9.4 miliona na sili ai i tausaga.

I le 2018/2019, o le tupe na fuafuaina e ao e \$530.2 miliona. O le tupe na aoina, e \$551.6 miliona, e \$21.4 miliona le sili na faasili ai. A tuu la i le isi

tausaga i le isi tausaga faaletupe, e \$29.2 miliona le tupe na mafai ona ao faasili e le Matagaluega.

I le 2019/2020 le tausaga lenei e alu mai le aso 1 o Iulai i le tausaga lea e oo mai i le aso 31 o Me, o le tupe ua aoina e \$505.8 miliona. O le tupe fuafua e tatau ona ao e \$527.7, lona uiga e toe \$21.9 miliona e tatau ona maua i le masina lenei o Iuni. O faamaumauga la e oo mai le aso ananafi, ua sili atu le tupe lea ua ao na i lo le \$21.9 miliona. O lona uiga ua ova foi le tupe na ao e le Ofisa o Lafoga i le tausaga faaletupe lenei 2019/2020.

E ala ona sa fesiligia e nisi sui usufono e pau tupe maua a le Matagaluega o Lafoga. O le ala lena lea ua ou toe faasolo atu ai ona o nisi fai mai ua pau le tupe maua a le Ofisa o Lafoga.

**Tofa Lealailepule Rimoni Aiafi:** Lau Afioga i le Fofoga Fatalai...

**FOFOGA FETALAI:** Malie le Minisita se i tulai mai le sui usufono mo Faleata Sisifo.

**Tofa Lealailepule Rimoni Aiafi:** Faafetai lava i lau Afioga i le Fofoga Fatalai. Faafetai i le Afioga i le Minisita ona o au lea sa ou taua le vaega tonu lea e ao ai lafoga fou lea ua aumai e le Afioga i le Minisita. O numera nei na lau mai e le Afioga i le Minisita, lea foi sa ou faamaumaua mai lava i le taimi faatoa tulai mai ai i le 2016 e oo mai i le aso, e matua lelei le aoga o tupe maua i lea tausaga i lea tausaga. Na amata e le i taitai oo i le \$500,000 a o lea o le a faasolosolo atu lava i luga ua lata i le \$600,000 le tupe e ao. O lona uiga o lau faamatalaga, o lea sa lelei atoatoa le faatinoga o le galuega, a o le mea lea ua fai i le system fou lea ua fai nei, o le faanaunautaiga, ia sili atu. E pei lava ona ou taua i lau lauga, e matua lagolagoina e lenei itumalo le sui o le system lea, o le mea e tatau ona fai.

Ae faafetai o lea ua tali le Afioga i le Minisita, o lea o le a vaavaai i ai i tulaga e ono fetuunai ai talosaga a i latou na talosaga mai. Aua e faigofie lava le faatinoina o le galuega, o lea foi e ia i latou faamaumauga o kamupani o lea e faamaoni e totogi a latou lafoga. O kamupani lava na o lea e faamaoni mai le 10 tausaga talu ai, e tatau foi ona ave i ai le latou fesoasoani.

I lenei lava taimi lau Afioga, ua taua soo lava nei mea o tupe pau ma deficit, ou te talitonu na o se Palestina vaivai e talanoa i lea mea. O le vaiaso na tea nei na pasia ai e Toga le latou deficit pito sili ona tele talu ona faavae lea Malo. A o le mea matautia e 21 sui o le Palestina, e na matua lagolagoina lenei paketi.

O Ausetalia i le tausaga lenei lau Afioga, fai mai le Palestina, o le paketi aupito sili lenei, o le deficit aupito sili lenei ona tele ua vaai i ai Ausetalia talu ona faavae le latou atunuu. A o lea ua tatou vaai atu nei i le pepa o le Aso Sa lea, o lea foi ua toe aumai le isi meaalofa tele a Ausetalia e fesoasoani

i tatou aoga. O le uiga lena o lau tala lau Afioga i le Minisita, ona o tulaga o le vaevaega ona e tulaga ese lenei...

**Susuga Hon Laauli Polataivao Leuatea (Gagaifomauga Nu.3):** Lau Afioga i le Fofoga Fetalai, e fia maua lava se avanoa faamolemole i le saunoaga a le sui usufono.

**Tofa Lealailepule Rimoni Aiafi:** E ave le fesoasoani i nai kamupani nei i lenei taimi tulaga ese ua tulai mai. Ma le faaaloalo lava.

**FOFOGA FETALAI:** Malo, ua maua atu le saunoaga a le sui usufono. Gagaifomauga Nu.3 sa e tulai mai, o ai e te fia faauilavea i ai?

**Susuga Hon Laauli Polataivao Leuatea:** Faafetai I lau Afioga ma le agaga faaaloalo, e pei e foliga mai o lea o le a toe alo i tua tatou talanoaga na o tatou... ua uma le Tala o le Tupe ma le saunoaga a le Minisita o Tupe. A o le toe taua lea o matou manatu e vaivai, se o le agaga lena o lea e soso atu ai, e tuutalaloa saunoaga a sui usufono, ae aua le taotaomia, o lou lava lea finagalo. Ae aua e te lafoa maia se upu faapena e vaivai o matou lagona pe a talanoa atu. O lea na agai le fautuaga e matimati ai ma faufau le finagalo o le Minisita o Tupe. Ae aua e te saunoa faapena e vaivai o matou manatu. Ia o si au faalalolalo atu lea lau Afioga i le Fofoga Fetalai e taua o matou lagona, lagona o matou itumalo, ae le o se vaivai. Ma lou agaga faaaloalo.

**FOFOGA FETALAI:** Faafetai.

**Tofa Lealailepule Rimoni Aiafi:** Lau Afioga i le Fofoga Fetalai...

**FOFOGA FETALAI:** Sa e taua le tulaga lea?

**Tofa Lealailepule Rimoni Aiafi:** A lea e faafogaga mai lau Afioga, o la e faalauaitele lava lou manatu o au lava ia, leaga sa ou taua le tefisiti, a lea na ou faamalamalamaga mai foi i le amataga. Ae ou te le i taua se suafa o se isi i lenei mea. Ioe, leaga o lea tatou te talanoa i le tulaga lautele, e le pulea foi pe afea sua e Leala se finagalo o se isi sui usufono mamalu. Afai o lona finagalo lea, ia o lona lava lea finagalo, a o le manatu ia o Leala, o le manatu a lea o Leala.

**FOFOGA FETALAI:** Malo faafetai. Ia tulai maia le saunoa.

**Afioga Hon TIALAVEA FEA LENIU TIONISIO HUNT:** Ia, o lena ua avatu se faamatalaga. Faafetai i le Afioga ia Liuga mo le lui sa tuuina mai e pei ona saunoa i ai. A o le mea moni, sa faatino lava le galuega a le

Matagaluega i le mea e gata ai le malosi ma lana auaunaga e tusa ai ma aiaiga o Tulafono o lo o faatonutonuina ai galuega mo le aoina o tatou tupe maua. Ae o ata vaaia foi ia o le agai i luma o le usitaia o aiaiga ma manaoga o le Tulafono i le au totogi lafoga e aofai ai tatou uma lava faatasi ai ma pisinisi tumaoti.

E tusa ai ma le faafesili i le olioli, e toe faaopoopo ai se faamatalaga e faapenei, e 3 lava ituaiga ava malosi o lo o gaosia i totonu o Samoa, o le pia, o le fagu malosi spirit ma le uaina, e le aofia ai ava malosi o lo o lauina mai fafo i totonu o Samoa. E tusa ai ma faamaumauga ma lipoti a le Matagaluega, e eseese foi auala methods ma ingredients e gaosia ai nei ava malosi ma ou te faapuupuu atu i ona vaega taua nei.

O le pia e gaosia mai le molo, fefete, suka ma le vai, ma e faamafu mo se taimi maua ai le pia. O le uaina araisa e gaosia mai le araisa, vai ma le fefete, faamafu mo le 20 aso pe sili atu ona vaimama lea aveese le araisa ona maua ai lea o le concentrated rice wine. O fagu malosi e gaosia mai le araisa, fefete ma le vai, e tunu, saka, distill maua ai le concentrated rice alcohol ona tuu ai lea ma le athedon maua ai le fagu malosi. Ua maea foi ona toe sueina e le Matagaluega mai le SROS i le aso Faraile 19 Iuni 2020 le malolosi o le ava faapea le suka i totonu o nei ava malosi. Taula Larger 660ml 7% le alcohol, 5% le suka. Taula, 4% le alcohol, 5.2% le suka. Sili alcohol soda, 7% le malosi, 9.4% le suka. Moni alcohol soda, 5.5% le malosi, 8.5% le tele o le suka o lo o i ai. Vailima Pure, 4.9% le malosi ae 4.3% le suka. Vailima Larger, 4.9% le malosi, 4.3% le suka. Olioli wine coke, 8% le malosi, 12% le suka. Olioli wine strawberry, pineapple, grape, lemon, 13% le malosi, 11.5%-11.9% le malosi o le suka. Olioli Uaina, e gaosia mai le araisa lea e faatoa ma le vai ma le fefete mo aso e 20 ona maua ai lea o le uaina malosi pe a vaimama ese le araisa ona sui lea dilute e le kamupani i flavor eseese, coke, pineapple, grape, lemon ma le strawberry e faaitiitia ai le malosi o le fagu uaina. E tusa ai ma le lipoti a le Matagaluega o Soifua Maloloina, o lo o ausia ma usitaia e le kamupani aiaiga ma manaoga o le falemai o lo o i lalo o le Food Act 2015 ma le Health Ordinance 1915 ma tuuina mai ai le Health Certificate i le aso 6 Aokuso 2019. Ua maea foi ona totogi uma mai e le kamupani e le excise tax mai le aofaiga o oloa atoa o pusa fagu uaina olioli sa gaosia ma faatau faatasi ma pusa fagu olioli sa faatauina i lisiti sese. Ma sa faapea foi ona tuuina i ai se sala tupe tele ona o lea tulaga taufaasese.

O le tulaga foi i le lisiti sese ua faamautinoa e le Matagaluega mai lana suesuega, e sese nisi o pepa i lisiti sa faaaogaina e le kamupani, ma o lo o faaauau pea le suesuega a le Matagaluega i le Ofisa o Lafoga a o le Ofisa o Tiute sa nafa ma le tulaga i le excise tax ma lona faasalaga lea ua maea ona faatino.

O le taimi nei o lo o taofia le toe gaosia o le uaina araisa ae se i faaleleia le CCTV camera a le nofoaga. O lea foi ua maea le fonotaga a le Liquor Board ma tuuina atu le faatonuga i le kamupani e sui le fagu e tuuina i ai le uaina

ae le faaaogaina fagu tioata, ae faaaaoga le fagu glass e aveese le plastic ma ia 1 le lita le tele o le fagu uaina ae le 550 e pei ona i ai. O le mea moni, sa taugofie le olioli ona o le taugofie o le fagu uga ma laitiiti le size sa tuuina ai le uaina. A maea ona faaleleia nei tulaga uma, ona toe agai lea o le Matagaluega e toe faaaauau le le toe faaaauauina o le gaosiga o lea uaina. E tusa ma le toa 40 le aufaigaluega, tagata Samoa o lo o faigaluega i totonu o lenei kamupani. Ma ua manatu ai le Matagaluega, se i tuu le avanoa pe a uma ona faaleleia mea uma nei aemaise le tagatagai o le Matagaluega ia mataitu lelei le gaosiga o oloa nei, ae a toe maua se isi faiga solitulafono o faatino e lea kamupani, o le a molia loa i le Tulafono i Mulinuu nei.

TIMS.

**Susuga Hon Laauli Polataivao Leuatea:** Lau Afioga i le Fofoga Fetalai, o sina mea laitiiti lava na ona fia faamalamalama atili i le saunoaga a le Afioga i le Minisita.

**FOFOGA FETALAI:** Se i tulai mai le Afioga i le sui usufono mo Gagaifomauga Nu.3. Tulai mai lau Afioga.

**Susuga Hon Laauli Polataivao Leuatea:** Faafetai mo le avanoa. Ona o le tasi lenei mataupu sa ou tuualalo atu ai i lau Afioga, ua le faatasi pe faalua, ua atulasi. Muamua, o le tatou safety, ia o lena ua ou tatalo atu. Silasila lau Afioga, o lea foi ua e faafofoga ua saunoa le Afioga i le Fofoga Fetalai, ia e auma nei tupe a o le healthy o le atunuu, e le o sefe le fagu lea e gaosi e le kamupani lenei, ua tele a latou mea faatogafiti, o lea foi ua ou toe taulimaina isi lisiti fou i le taeao lenei. Ia na ona avatu lava e fesoasoani. O le itu sili ona taua e le o aoa uma tax. O excise tax, si au tamai omiomiga na fai, e le tatau ona i lalo ifo o le \$2 miliona le excise tax a le kamupani lea i le lumanai i tausaga taitasi. Na ona ou faapena atu, leaga o lea e te lailoa lau Afioga i le Minisita e saili tupe e tau faafoefoe ai le mamalu o le atunuu. O lea foi e te silafia o lea lava ua tatou laaloa e agai e tax faifeau o le le lava o lau faasoa, ae o lea e taaalo le aualii ia. Ia o le agaga lena ma le faaaloalo, e toe faaoo atu foi isi lisiti ia ina ia sao ma amiontu suesuega a le Matagaluega. Ma lou agaga faaaloalo.

**FOFOGA FETALAI:** Se i tulai mai le Minisita.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai. E i ai le vaega o le saunoaga a le sui usufono e tatu ona ou faasaoa. O le faiga o lafoga a faifeau, e le i faia ona faapea ua gau. O le agaga na ou faia ai, o lou manatu lea ina ia totogi lafoga tagata uma, e le na o susuga foi i faafeagaiga, sa totogi lafoga ai ma Le Ao o le Malo, Le Ao o le Malo, sa totogi lana lafoga. Na pau lava le naunautaiga ia

te au ma le Matagaluega na ala ai ona fai, ia totogi lafoga tagata uma. E faaaaoga e tagata uma auala, e faaaaoga e tagata uma le vai, le moli, le falemai. O fea e sau ai le tupe? Ia e taumafai le Matagaluega nei, o a seleni, o a sene e maua, e avatu i le Afioga i le Minisita o Tupe. Ae faafetai mo le...

I le olioli lava ia, a foi lea ua ou fai atu, a fai atu lava nuesuega ua tatau ona tapuni tapuni le olioli, ae tatau ona tapuni ua i ai nisi nuesuega faapitoa. A oo lava ina ave i fafo fagu nei e fai, e ave lava, ae a oo lava i le taimi ua tapuni...

**Susuga Hon Laauli Polataivao Leuatea:** Lau Afioga i le Fofoga Fetalai, ou te tulai atu i le ava ma le faaaloalo tele i lau Afioga, e leai lava se agaga...

**FOFOGA FETALAI:** Se i toe tuu atu le avanoa ia Laauli.

**Susuga Hon Laauli Polataivao Leuatea:** Lau Afioga i le Minisita, ou te le toe asaina le mea ua uma ona tatou finau ai i le lafoga a faafeagaiga ae matou te tuitui malofie pea ma momoli atu le talosaga, tuu atu i ou tafatafa. A o le tagi a le pumate, fetuunai lau tofa leaga o lea ua faamaonia e le o aoa uma tupe ia e faitogafiti ai le aualii ia, ae o le a lavea ai fua le maaveave le fua i le paia ma le mamalu o faafeagaiga taulagi. O le tatalo lena, ae taatia atu, o lo o i ina le pule fitalia e faatino ai.

**FOFOGA FETALAI:** Ia, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, taatia maia lou finagalo i le vaega lea e te agai mai i ai i le aufaipisinisi, aua o le galuega lena e fai ia aua lava ne i alo se isi i le totogiina o lafoga, ae soia tatou te toe taua faafeagaiga. O lena ua saunoa le Minisita i le agaga tonu o mea nei o lafoga. E le tatau ona i ai se isi e tetele ni ana tupe e le totogia ni lafoga. Ma o lea foi ua uma ona taoto aiaiga i le tupe afai e oo i ai e maua le seleni e aiaia e le totogia ni lafoga, e \$15,000, e aofia uma ai lava tagata. Ae a sau loa lau seleni ua \$16,000 na o le \$1,000 lava lena e ova i le \$15,000 e fai ai si tamai lafoga. Lau Afioga i le Fofoga Fetalai, o Tulafono e o uma ai lava atunu o le lalolagi i le mea lea, ae soia tatou te faaoloataua, faaaaoga suafa o faafeagaiga lena o le sui usufono lea sa saunoa atu nei ua leva ona alu lana talaiga i faifeau e tetei i le Tulafono. O le mea lea e sili ona leaga, o le toe logo mai o au e faifeau o le talaiga lenei e alu atu le sui usufono ma fai, a o le mea ua uma ona pasia e le Maota lenei.

**FOFOGA FETALAI:** Malo. Tulai mai, masalo Laauli e le toe talia...

**Susuga Hon Laauli Polataivao Leuatea:** Lau Afioga i le Fofoga Fatalai, o lenei lava e lau mai le faaleaga o taita o le faaoloataua...

**FOFOGA FETLAI:** Malie lau Afioga i le sui usufono mo Gagaifomauga, o le a ou le toe tuu atua se avanoa...

**Susuga Hon Laauli Polataivao Leuatea:** Ia tasi ia ae foi, tasi ia ae foi. Lau Afioga, e leai se mea e toe faia e faaoloataua se isi. Faafou upu a le Taitai o le Malo.

**FOFOGA FETALAI:** E i ai le manatu, o le lafoga lenei o le saofaga e fai e tagata uma, ioe. E tatau ona faaupu faapena ia faisaofaga tagata uma, ia tofu le tagata ma lona sao i le vai, eletise, aoga ma mea uma faapena. Ia, ae ui i lea, e faapena se lagona, ae malie aua le toe taua faifeau ae tatou o lava i saofaga po o lafoga, leaga a tau loa faafeagaiga, e pei o le a toe toso tatou i tua i le ogasami o lea sa tatou asa mai ai ma faamalamalama i le agaga e atiae le atunu ma tulaga faapena. O lea foi sa alu le fia aso o tatou faapupula lena vaega, e fesoasoani mai foi Malo mai fafo pe a vaai mai o lea tatou te muai fesoasoani lava tatou ia tatou, ona fesoasoani mai lea o atunu i fafo. E pei foi o le finagalo o le Atua, e silasila mai le Atua o lena e te galue, e le na o le tatalo ma nofonofo, e tatalo ma galue. A silasila mai la le Atua o la e te galue, ona faamanuia lea i galuega a ou lima. Ioe, ae le faamanuia mai. A faamanuia mai i se a? e leai sau mea o faia.

Ia, faaaauau alii le saunoaga.

**Susuga Hon Laauli Polataivao Leuatea:** Ioe lau Afioga, o le a folo pea le oona o faaleaga ma tuuaiga ia e fai mai, ua ou talia. O le a folo pea.

**FOFOGA FETALAI:** Faafetai. Ia, tulai maia lau Afioga i le Minisita.

**Afioga Hon TIALAVEA FEA LENIU TIONISIO HUNT:** Ia, ona ou oo mai lea i le TIMS o lo o vevesi ai lenei vaitau i le au faipisinisi. Aemaise foi ni sui usufono sa laga lenei TIMS. E na o le 4 lava mataitisi o le polokalame lenei o le matou Matagaluega. Na ou tauaveina le tofi o Minisita o Tupe Maua ma Tiute, o le alaga lava ia a le aufaipisinisi e fai mai, e le o level le plainfield i le au totogi lafoga GST. E i ai le vaega lea e le totogi lafoga, e i ai au vaega ia e nana i faletupe le GST e le o aumaia. O le gagana lena sa oo mai ia i matou i le taimi na matou tauaveina ai le tofi. Na amata i ina ona saili se faiga, po o le a se faiga e laugatasia uma ai le aufaipisinisi, ia aua ne i toe maua le mea lea, fai mai o la e nana tupe i fale, e le teuina. O le tali la lea, o le TIMS, ona e mafai ai e le Matagaluega ona mataitu ia tupe o lafoga. O le taimi e fai ai lau faataua ua i totonu o le server a le Matagaluega le faatau lea. E mafai ai ona mataitu le aofaiga o le lafoga GST ua uma ona

e aoina. Avatu lau return o le 2 masina ma fai atu le return o le GST, ua uma ona iloa e le Matagaluega le aofai o le GST lea o le a e faatumuina atua.

E pei o le faamatalaga na fai atu i se taimi ua sola, e tatau ona tutusa fuainumera o lo o ia matou, ma fuainumera ia e te avatu e faatumu atu ai lau GST i le 2 masina lea. E faigofie ai ona matou vave ona faatino mai ia refunds ma isi mau mea. Ae o le agaga lava ia o le TIMS ia foia ai le faafitauli lea e faapea ua tele tele le au le totogi lafoga. E tusa ai ma le finagalo faaalia o nisi sui mamalu, pe mafai na tolopo le faaaogaina o lea metotia faa-eletoroni mo le mataituna o lafoga. E faamalulu atu, o le a le toe tolopoina le aso e amata ai aloaia lenei polokalame ona o itu nei. Mo le silafia, e le na o le VAGST e matauina e lenei polokalame. E matauina ai foi tupe maua o le tausaga atoa, annual sales. Ona siaki ai lea pe talafeagai a latou income tax po o lafoga o tupe maua faale-tausaga, o lo o faailoa mai e totogi mai i le Matagaluega. E taua lenei polokalame i lo tatou Malo, aemaise lenei vaitau ua agai i luga le faaaogaina o auala faa-eletoroni e faatino ai fefaatauaiga po o le e-commerce, sa saunoa i ai le Minisita o le MCIT. Ma o le vaai mamao foi lea a le Matagaluega ina ia vaai e le Malo le lafoga o tiute, mai fefaatauaiga faa- e-coomerce ua agai i luga lona faaaogaina, e le aufaipisinisi. Ma o tapenaga uma nei a lo tatou Malo, faatasi ma Tulafono faa-lafogaina.

O le tau atoa o lenei poloketi e \$3.4 miliona, ma sa amata faalauiloa mai i le tausaga faale-tupe ua tuanai, ma tatala aloaia ai loa i le aso 4 o Mati 2020. Ma e 4 masina sa tuuina atu e tapena ai le kulupu muamua mo le amataina o le polokalame, i le aso 1 o Iulai 2020. E 5 vaega po o groups o tagata faipisinisi totogi lafoga ua fuafua le Matagaluega, e auauai mai mo le resitalaina i le polokalame, TIMS. O le kulupu muamua, e amata i le aso 1 Iulai, e 210 pisinisi lapopoa ia ua faamuamua. O le Kulupu 2, aso 1 Oketopa 2020 e 1,500 pisinisi. O le Kulupu 3, 1 Ianuari 2021 e 1500. O le Kulupu 4, aso 1 Aperila 2021, 2,000 ma le Kulupu mulimuli, aso 1 Iulai 2021 e 3,000. A tuu faatasi e 8,210 pisinisi lea o le a faamoemoe, e taunuu atu i le aso 1 o Iulai 2021 ua atoatoa. O le Kulupu 1, e 4 masina lea na tuu atu e tapena ai, ona tai 3 lea o masina ma va ai, resize kulupu e toa 4, o lo o mulimuli mai. O le naunautaiga ia tuu uma i totonu o lenei polokalame pisinisi fefaatauaiga, mo so o se oloa, goods, po o so o se auauanga, service. Pe tele pe ititi aua e i ai ma tele ni itu taua ma aoga mo latou uma aemaise foi le tatou Malo.

O nisi nei o itu lelei mo le aufaipisinisi totogi lafoga. E puipua ai tagata faipisinisi totogi lafoga o lo o faamaoni i le totogiina o lafoga sao, mai faiga faatauvaga le talafeagai. E manino ai faamaumauga ma mafai ai ona tali atu i mataupu tau lafoga. E faaitiitia ai le tau mo le usitaia o Tulafono, mo tagata totogi lafoga. E mafai ai e le pisinisi owner, ona mataitu a latou faatau aemaise le faagasologa o le pisinisi e tagata faigaluega. E lesitalaina ai le tulaga i tupe faaalu ma tupe maua e ala i fefaatauaiga faapisinisi ma isi pisinisi, ma o le a faigofie ai ona siaki tulaga o lafoga toe faafoi atu, mo

refunds. O itu lelei mo tagata faatau, ma o paaga ia a le Matagaluega, e manaomia lava le latou fesoasoani. O oe lea e te alu atu e fai lau faatau, faamolemole tapa le lisiti lea mai le masini, ina ia faamaonia o lau \$100 lea na totogi i le faleoloa, na e i ai le \$15 o le lafoga, ia alu sao mai le Malo ae le o le taga a le faatauoloa. E manaomia la le lagolagosua a le mamalu o le atunu, ina ia tapa le lisiti, ina ia mafai ai ona ao uma lafoga o le VAGST. O itu lelei la na mo le tagata faatau, e mautinoa le faamaoni o lisiti faamaumau e faamaumau mai masini faa-tekonolosi faaonapo nei. O lo o faamaonia i lisiti po o pepa o faamaumauga, o lou sao taua lea mo le agai i luma o le atunu, ma fesoasoani tele e faatupe atinae a le Malo. Ia manino le aofaiga o lafoga e tuuina atu i le Malo, i itu lelei mo le Malo, ia tutusa tagata uma i le totogiina o lafoga. E faaititia ai gaioiga ma faamaumauga tau tamaoaiga e le o mafai ona lafogaina, mai faamaoniga o tagata ua lesitala.

O le natura o le pisinisi ma le nofoaga o le pisinisi. O le faaaogaina o le faa-tekonolosi faaonapo nei, e matau faiga faasolitulafono ma faaititia le aloese mai lafoga. E moni, e i ai tupe faaalu expenses a pisinisi uma, e amata ai lenei polokalame. Ma e tasi foi le taimi e pagatia ai le faipisinisi, e tapena ai masini electronic fiscal device, e faatino ai lenei polokalame, ae peitai e umi le taimi ma tele tausaga e aoga ai lenei polokalame. Mo le pisinisi ma e tele itu lelei o le a faapea ona maua e le pisinisi, o le a sili atu ai ana tupe maua i lo tupe faaalu. Aua o lea o le a lesitala uma lava faatau a tagata e o atu e faatau, o le a le mafai ona alu atu ona tago lea o le cashier tuu i lana taga. E leai se lisiti e aumai, e alu ma ave. Ma e fautuaina pisinisi uma aemaise o kamupani tetele, ina ia invest a outou seleni i masini faaneionapo, electornic fiscal device e koneti ai i lenei polokalame, aua le lumanai manuia o pisinisi. A gasolosolo lelei ma mautu faamaumauga a le Matagaluega mai le TIMS ma mautinoa ua agai i luga le usitaia o tatou Tulafono o lafoga ma tiute, level of compliance increasing e mautinoa foi e i ai se fetuunaiga o tax rates a lo tatou Malo, e lelei mo le lumanai. O ai na iloa a lelei faamanuiaga te i ua toe pau le GST. A le o lena pe toe pau a tou lafoga corporate taxes a kamupani. Pe a lelei ma mautu ua i ai ni faaopoopoga mai o tupe maua mai masini nei, e toe foi atu lava le faamanuiaga i le aufaipisinisi. E faamoemoe lenei tulaga mo le lumanai, pe a tatou galulue faatasi e faatino lenei polokalame ae le o le taumafai e alofia avoid. Ona ua maea ona faataatitia ma logoina atu fuafuaga a le Matagaluega mo vaega e 5. O lea o le a agai ai pea le Matagaluega e faatino le amataina o le polokalame, i le aso 1 Iulai 2020 o le vайасо lea e amata ai. O le fautuaga, lesitala kamupani uma ia e 210 lesitala, e le alo le sala. Ae lesitala i le Matagaluega ae le i oo i le aso 1 Iulai. Ae mo nisi kamupani o le Kulupu 1 ua talosaga mo ni taimi faaopoopo, i le tali lenei e faatino ai a latou tapenaga. O lo o faatino le iloiloga totoa a le Matagaluega, ina ia faamautinoa e sao ma moni mafuaaga ua tuuina mai ona tuuina atu lea o se faaiuga, a o le i amata le polokalame i le aso 1 o Iulai 2020. Ma e eseese uma mafuaaga a pisinisi taitasi, ma o lea e iloilo totoa ai

nei mafuaaga ma tuuina atu le tali mo le pisinisi lava ia, case by case review, ae le o se tali e ta aofia ai uma le Kulupu e 210. O lona uiga, afifio ane e talanoa, lesitala faatalanoa ma maua lava lea o le avanoa i le Ofisa o lafoga. Ae a e musu e te sau e te lesitala, e amata i le aso 1 o Iulai le faasalaga, e tuusao lava, e okometi. Ae mulimuli ane se faamatalaga i le malosiaga faale-tulafono ua i lalo nei o le Tulafono Faatonutonu mo Masini Faaeletoroni 2020 TIMS Regulation 2020.

O lo o i ai ni faasalaga tetele ma so o se isi lava e le usitaia aiaiga o lenei Tulafono e amata mai lava i lou le agai mai i le Matagaluega e te lesitala. Faatogafiti ona faatino le polokalame, faaseseina le polokalame, ma isi lava auala o le lepetia ai le sao ma le lelei o le polokalame, e faasala. Ma o le a ou le tomalaulaunina nei faasalaga faale-tulafono. Aua e tele lou talitonuga o le a tatou galulue faatasi, soosoo tauau e faatino le tatou polokalame aua se manuia o le tatou atunu. O le agaga o le Malo ia tutusa tagata uma i le totogiina o latou lafoga. Ma tuuina atu le auaunaga ina ia faapea ona faamalieina tagata totogi lafoga uma, e ala i auaunaga e tele mo tagatanuu uma. E pei o faleaoga, falemai, aualatele, vai, moli eletise, internet ma isi. O lo o faapena ona faatupeina mai i tupe maua a le Malo o lo o aoina e lenei Matagaluega. O le lumanaia lelei, fafia, saoloto ma le saogalemu o le tatou atunu, o lo o i lima o tatou uma pe a tatou galulue faatasi. O lena ua uma atu le faamalamalamaga o le TIMS ma le aoga i le Matagaluega ma le Malo, aemaise foi o le aufaipisinisi.

**FOFOGA FETALAI:** Malie le sui usufono mo Vaimauga se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E i ai lava si au tamai faaopoopo i le Tulafono lenei, aemaise lava le vaega lea e faaiu i ai le saunoaga a le Minisita i le tulaga o le Malo, e pei se itutino e toe fasoasoa, faasoasoa atu seleni i lea vaega o le atunu ma lea vaega o le atunu, mai ia i latou o la e tele nai a latou seleni. O le taua ia o le faatupu manatu lea na aumai i le fesoasoani a le Malo, e avatu ia i latou ia o faiaoga, totogiina o faiaoga a ekalesia ma aoga tumaoti. E taua tele le itu lea, leaga o le faa-aoogaina o fanau, o le mea tupito lea a matua uma lava. A tatou talanoa loa i fanau, ua tatou talanoa i le lumanaia o Samoa. Ae faalagolago le fesoasoani i le tulaga lea o le lava o tatou seleni. E taua ai le Tulafono lea ua faatu atu nei. E tele foi manao ua aumai, i aualagalue, faafaigofie ai ona atiae faatoaga. Ae o na vaega uma, e aofia ai ma fesoasoani e avatu i nisi o pisinisi. E manaomia le fesoasoani, o le mea lena e tatau ona fai e le Malo. O le aumai o tupe mai ia i latou o lo o lava nai a latou seleni, toe faasoasoa atu ia i latou o lo o manaomia le fesoasoani.

O le masina o Tesema i le 1996, na ma o ai ma le Kovana o le tatou Faletupe Tutotonu i Peretania i se fonotaga tele lava, e faatatau i lafoga e sailia ai seleni a atunuu. O le ala foi lena na ou malaga ai ou te fia faalogologo. Ona ma o atu lea ma afea muamua ia Moscow i Rusia, faatalanoa ai nisi o investors e invest mai i Samoa. O le mea matautia i le fono lenei, sa i ai foi ma isi loia mai Samoa nei, o le tumu o tagata faipisinisi. Ae na maua mai ai nai au mea. O le mea taua na maua mai ai i ina, o le saunoaga a le tasi o tagata poto faapitoa i le mea lenei o lafoga ma le aufaipisinisi. Fai mai lana saunoaga, “O outou nei o Faauluuluga o Malo ma outou nei o lo o nafa ma le aufaipisinisi ma a latou lafoga, ia outou manatua le mea lenei, matait u lelei le aufaipisinisi uma lava, aemaise lava pisinisi e faamaoni e totogi a latou lafoga, matait u lelei latou e faamaoni. Aua na ona faaletonu lava, na ona emo lava o lou mata, tuu loa ma le faamaoni ae fai le piopio.” E pau lava lea o le mea e popoto tele, po o le a lava le faamaoni, e faamaoni i luga o le lelei o le Matagaluega o Lafoga, ma le matait uina o latou tusi e aumai ua uma ona sueina, e suetusi faamauina. E le o aofia ai i i suetusi e le i faamauina piopio, aua e i ai foi suetusi e faapena, e piopio. E i ai le upu foi lele, they cook the books, e na o taus i tusi ma suetusi ua faamauina, e tatau ona faaaoga. Ae na ona pio lava ua faaletonu le vaai a le Matagaluega, pio loa.

O le mea la lena e taua tele, matait uina o le ala lena e taua ai le fai o mea ia, fai o masini. Ae a le toaga foi la ma tilotilo le Matagaluega i le faaaogaina o masini ia, e ono kalepe foi ia masini. O le taua lena o le i ai o mea ia o faasalaga. Ona fai lea o le matou aiga e faatofa ai le isi i le isi, ta le 10 ae tuua. Na ona matou o ese mai lava ae pepe loa ma moli a Lonetona, pepe uma lava moli. Ona ou faapea lea, Lonetona o le laumua o le lalolagi o mea tau pisinisi, ma le matautia o mafaufa o faiai o tagata, o lo o faatinoina policy eseese, ae o lea ua pepe moli. E toeitiiti atoa le 5 itula o pepe, matou te o mai i fafo, ua pogisa faasoloatoa Lonetona. O Lonetona o le laumua o Peretania tele, a o lea ua pogisa. O le isi lena au mea aoga na maua mai ai i i. E oo lava i le atunuu e pito sili ona toatele ai le aupopoto, ma mea o tekonomosi eseese ae o lea ua pepe moli. O le mea ua tupu, matou o mai i fafo, ua tumu atu i tagata masalo pe ova i le 100 ma 100. E sau mai lalo o auala ia e o ai ia nofoaafi, train, ua pepe ma train, o lea ua o mai uma, que faasoloatoa i i, toeitiiti atoa le itula. A o Tesema, o Tesema, o le winter lena i le itu i matu. Na matua ou malili ma ou ma’i ai i ina, i le tu tu i fafo, e tau sue se taxi, ua sioki foi ma taxis latou. Toe maua si na mea aoga, o Lonetona pepe uma moli, le lava taxi e feaveai ai matou, toeitiiti atoa le itula, o ou freeze ai i ina, i le tau faatalitaliga o se taxi. Freeze, pepe moli, maua ai ma lau lesona. Vaavaai uma lava le aufaipisinisi ia e totogi lafoga, ia mataala i tausaga uma tausaga uma tausaga uma.

Lau Afioga i le Fofoga Fetalai, o le ala lena, e le faapea la, o le tulituliloa o se isi vaega, ae leai leaga o le Tulafono lava ia o le totogiina o lafoga, o

tagata uma lava o le atunu, e totogi a latou lafoga mo le latou Malo. O le latou Malo ua fia sefulu tausaga o fita i tuga ai Taitai ua lagomau i Tiasa, ina ia maua so tatou Malo, e ola i lafoga. E faapena foi le Malo o Isaraelu i le tele o le mau tagata o taua, ae 12 ituaiga o Isaraelu. O le taimi o Tavita e 12 ituaiga e tofu lava le vaega ma le fia sefulu afe o tagata fitafita e aumai e fai ai le army. O lona uiga, e le i lalo ifo ma le kuata miliona. E faapefea ona tausi? E tausi i lafoga. Lau Afioga i le Fofoga Fetalai, o lafoga sa totogi e le gata o tupe, ae totogi foi i taumafa, faasolo mai lava i na ona po e tau mai lava i le taimi lenei, o le mea lea e ola ai atunu, o lafoga.

O le faaiuga la o lau tala, e le i umi ona ou taunu mai i inei, ae tu le toeaina lea sa fai le lauga i inei i Samoa. Na sau e talosaga sana laisene, ona o lea foi e invest mai i inei i Samoa, e sue se laisene e fai ai le stock exchange maketi. Ona ou tapa lea o le Matagaluega lea e faafeagai ma le mea lea, o le a le tou fautuaga. Fai mai le fautuaga e le talafeagai, ona ou logoina lea o le alii lea sa lauga i o i Lonetona, invest i Samoa. E malie ua le talia, fai mai au fautuaga e le talafeagai. Pe 2 ea vайaso ae ou toe fesili atu i le Matagaluega, o i ai lava investment... ua to uma lava ua aveese ma Samoa. Lau Afioga i le Fofoga Fetalai, o le tulaga lena, e aumai ia le fautuaga a tatou aufaigaluega, tagata na aooga i fafo ma maua faailoga, tagata sa galulue i fafo. O le faalapotopotoga lenei faava o Malo, ua masani i le mea lea. Sa galulue i fafo e pei foi o le Taitafono o le Komiti o tupe. E tasi lea toa sa galue i Faalapotopotoga faava o Malo, faapea foi le Minisita o Tupe, o le tagata muamua lava lea, na amata le polokalame lea, o le galulue i Faalapotopotoga i fafo tau tupe, ina ia malamalama e o mai ia latou ia mai fafo i Faalapotopotoga, ua iloa uma e tatou le tulaga o mataupu tau le... po o le lafoga po o le atinae o le Malo ua matua malamalama lelei.

Lau Afioga i le Fofoga Fetalai, o lou toe tulai atu lena. E feololo isi ia, o le a ou le tau atua, sa galulue foi i Faalapotopotoga Faava o Malo, i te i ua mimitavale ai. Ae ua lava ia le toalua lea, leaga o laua ia, e faafeagai ma mataupu nei tau tupe a le Malo. Aemaise o tulaga ia e lava le seleni e maua mai i tatou Matagaluega o Tupe Maua e faatupe ai mea ia e mananao i ai outou o sui usufono o itumalo e tali atu ai i le manao o tatou itumalo.

**FOFOGA FETALAI:** Tulai mai le Minisita.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, mo le faasaoina o le taimi o le Minisita.

**FOFOGA FETALAI:** E a, e le i maua atu i le saunoaga a le Palemia.

**Afioga Sulamanaia Fetaiai Tauiliili Tuivasa:** E i ai mea na e misi, o lea ua uma mai le tele o mea, ae na e i ai si vaega na e misi i le saunoaga a le Palemia. O le tulaga lea i le system lea, e momoli le agaga faafetai, i le

Afioga i le Minisita ona sa taua i lau lauga. O le tulaga foi sa le faalavelave o e saunoa foi. E pau lea o le Minisita e tele ia o tuualalo a lenei sui usufono. Ona o le poutu lea o si o tatou Malo o lau Matagaluega ma le suega foi o seleni, e faafetai atu ai i lau Afioga. O le tulaga sa ou taua, o le Tala o le tupe lea na i ai i le Financial year lea o le a uma nei. O lea sa tele o le uiga lena o lau tala, e le faapea e fai atu o pau, pe \$52 7 miliona. O lea ua alu le tatou Financial year lenei ua alu, e pei o lea ua tuu i lalo, o le uiga lena o lau tala lea e fai atu po o ua... a o lea e maua lava o lea e te lototele, e le i uma le financial year, a o lea ua e faalauiloa mai. O le tulaga i le system lea na talanoa atu ai lau Afioga lea na taua e le Palemia. Faafetai lava i lou tulai mai ma aumai ni system e run ai le tatou Matagaluega. E masalo o le tausaga ua tuanai sa ma o ai ma le sui usufono lea o Sooalo i le atunuu lea o Singapore, o le system la e alu ai le vaega lea o le aumaiga o container i luga o le uafu, sau lava le taavale se i tulou le Maota nei, sau lava alu i totonu o le masini ia. A mumu mai loa le masini mumu, o lona uiga o la e i ai mea la e i totonu, toe see mai loa faatoa faasee loa i le itu la e i ai le custom mo le suega, faatoa gaoioi loa le tiute. O popolega la lea e i ai lou sui usufono i le masini lea pe a aumai, aua e tiga lava ona vaai atu le custom o la e mumu mai, ae faapea, alu, alu, e pei e faapena le faiga. Aua o Singapore e mumu mai loa le moli momu, faasee loa i le isi itu e saili e le custom. A o tulaga lea i le tatou masini, e pei lava o le tatou masini o lo o i le malaevaalele, e o mai lava tagata tuu i totonu a latou ato, e vaai mai loa o a outou Afioga o Minisita lagolago, fai mai loa, alu, ae o la e i ai mea la e i totonu e tatau ona tiute. Ona o le e control e... ae ana control lava e le masini ia, e pei o le vaega lena. Ae momoli lou agaga faafetai i le tulaga ua faaaogaina ai...o le manaia ia o le system lea a oe lea e te saunoa ai.

Ae o le popolega foi o le sui usufono, leaga e pei o lea ua e silasila i le tulaga o faleoloa ma supamaketi. Ae se i vaai mo mea o construction foi na e tetele tupe e maua ai. Po o i ai se control faapena e install ai ni vaega faapena i Konekarate tetele ia e maua ai tupe. Aua o nai faleoloa lea o le ave ai ia le system lea a tatou, o nai pinati lava. Ae o i o le tele lea o tupe maua lea mai lo tatou Malo, se i silasila ane i ai i le vaega lena, na pau lava lena o le toe faamanatu atu i lau Afioga i le Minisita.

**FOFOGA FETALAI:** Malo, ia tulai mai le Minisita.

**Tofa Namulaulu Sami Leota (Faasaleleaga Nu.2:)** Lau Afioga i le Fofoga Fatalai...

**FOFOGA FETALAI:** Ia se i tulai mai le sui usufono mo Faasaleleaga Nu.2.

**Tofa Namulaunu Sami Leota:** Faafetai mo le avanoa. O lea foi sa momoli le faamalo i le Afioga i le Minisita i le system lea, aua o le tasi lea finauga sa tuuina mai o lea ua maua mai i le Minisita ia ogatasi ma level plain field. E pau lava lea leaga e feololo foi nai tamalii o lo matou itumalo o lo o talosaga mai, i le install ina lea o le system, e fai lava si technical tele. Pe e maua atu ai se fesoasoani a le Matagaluega ia faapea ona install le system lea i totonu, e tusa pe charge ai le tupe, ona o le latou matau, e fai si lavelave o le faapipiina o le system lea i latou faleoloa.

E le o tetee o la e fiafia i ai, ae na ona talosaga atu i lau Afioga i le Minisita ma le Matagaluega, pe maua se fesoasoani i le vaega lea? E tusa lava foi pe charge ai faleoloa ia, ia ae o le latou talosaga foi, ia ae o na ua saunoa lau Afioga o le a amata ia Iulai, ia e mulimilitai ai lava. Ae e pau na o le talosaga pe maua se fesoasoani mo le vaega lea, ma lou faaaloalo faafetai.

**FOFOGA FETALAI:** Malo, e sao foi le finagalo o le sui usufono, se i tulai mai le Minisita.

**Afioga Hon TIALAVEA FEA LENIU TIONISIO HUNT:** Ia, faafetai i lau Afioga mo le avanoa. Ia ou te iloaina o le tali atu i le fesili a le uso ia Sula...

**Afioga Fuimaono Teo Samuelu Teo:** Lau Afioga i le Fofoga Fetalai, pe mafai ona faatea atu au ona... e faasaoina ai le taimi o le Minisita.

**Afioga Hon TIALAVEA FEA LENIU TIONISIO HUNT:** A ou tu i luga... se faatali se i uma atu le lua lea...

**FOFOGA FETALAI:** E leai se mea i le tatou Tulafono Tumau o tau ai se faatea o se sui usufono, e na o le tuli i fafo, oi o lau tulai mai o se mea e faasao...

**Afioga Fuimaono Teo Samuelu Teo:** Ia, pe maua se avanoa ona o lea sa taua foi i le lauga a lenei sui usufono le vaega lea.

**FOFOGA FETALAI:** Se i tulai mai i se mea e fia faasao.

**Afioga Fuimaono Teo Samuelu Teo:** E le toe tele se tala i ai aua o lea ua tele tala i le system. Ae pau lava le mea i le... pe mafai ona... aua o le system lava lea o lea na tau faaaoga i Fiti. Pe i ai se mafuaaga ua ala ai ona toe tolopo e Fiti ia le faaaogaina o le system lenei. Po o i ai se vaivaiga, ne i te i ua on ai tatou, ae mulimuli ane o lea e i ai se faafitauli e ono tulai mai. E pau lava lena o le fesili foi lea na ona o lea ua maua, o lea e ogatasi tatou ma le

vaega lea, ae o lea ua delay le faaaaogaina e Fiti o le system lenei. Ia ma le agaga faaaloalo.

**FOFOGA FETALAI:** Ia faafetai. Ia e manaia foi le faamanatu a le sui usufono ae se i tulai mai le Minisita.

**Afioga Hon TIALAVEA FEA LENIU TIONISIO HUNT:** Ia faafetai i lau Afioga... ia o le Afioga ia Sulamanaia, e sao le... tasi lea tagata galue o le Matagaluega ua loa tausaga o i totonu o le Matagaluega ma e tele foi lana tautua sa i ai. Ma o le tele foi ia o ana fautuaga na aumai ia te au ma tuualalo, masalo pe nao le 10% lea ou te faaaaogaina, ona ua le mafai ona toe foi i tua le Matagaluega ua na o le alu lava i luma le mea lea...

Ia, ua le toe maua le mea lea e mumu le moli mumu ae alu pea. Ua e tagai nei i le aoina o lafoga, ana mumu le moli ma alu, e le maua tupe ia ua mafai ona ao e le Matagaluega. E pei foi o lou taimi sa i ai sa tele lau tupe sa ao. O la e i luga o lau kesi ia le... maumau pe ana e toe foi atu. A e le toe sau i le Paeaiga i le tausaga fou, toe apply atu i le Matagaluega, ia atonu e talia oe e le Afioga a Matafeo, ona sa e galue ma le malosi i le Matagaluega, ia ae o le TIMS e pei ona ou fai atu e 210...

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai e manaia ia o le saunoaga a le Afioga i le Minisita, ona o lea ua pei ua tago fai lou faaiuga. A ou toe apply atu la ae e te le o toe i ai i o, o le a la le mea o le a fai?

**Afioga Hon TIALAVEA FEA LENIU TIONISIO HUNT:** A lea e te faafofoga mai, e te apply ia Matafeo, e le o au. O lea na alu atu lava le tala, apply ia Matafeo atonu e... aua o lea ou te iloa e te le toe sau ou te le toe sau foi.

Ae o kamupani uma ia e 210, o lo o i ai uma lava konekarate lapopoa, aufai auala, faifale, e ave uma i ai masini ia. E moni e le fai ia ni latou tupe totogi i aso taitasi, o tama na pe e tasi le masina pe tasi lava le latou siaki pe miliona, i le tupe maua, ia ona faaaaoga mai lea. Ae o lo o lavea uma so o se pisinisi, e le faapea e na o faleoloa le... ia o le fesoasoani a le Matagaluega i le install ina o... a lea ua uma ona logo atu ia le... talanoa, talanoa i le Matagaluega i le mea e mafai ona fesoasoani atu ai. E le mafai ona ou tali atu e mafai, pe le mafai. Ua uma ona avatu le fautuaga, talanoa.

O le tele o tagata e fefefe e talanoa i le Matagaluega nei o Lafoga. Na ou sau lava o faapena. Ou te leiloa pe aisea? Ae e pau lena o le auala e foia ai sala. O sala foi a le Matagaluega e okometi lava i le masina, 20% pe afai o lafoga e le totogia. Ae ou te le malamalama pe o le a le mea e le mafai ai ona o atu e talanoa, talanoa mafuaaga.

O pisinisi uma, lelei nei, leaga taeao, lelei i le vайасо lea, ae fefe e o atu e talanoa. Ae a talanoa, o alo foi ma fanau a le atunuu la e vaaia ia le Matagaluega. E taua ia, e le mafai ona matou vavamamao ma matou paaga. O paaga lava a le Matagaluega o Lafoga, o le aufaipisinisi, aua foi a leai latou e le mafai ona maua tupe ia e ao e le Matagaluega. O latou le poutu e faamoemoe atu ai le Matagaluega, i latou lafoga e mafai ona totogi mai. E le mafai la ona faapea e matou te mumusu e talanoa, e tatau ona talanoa, e femalamalamaina, ma ia totogi mai lafoga. O le naunautaiga lava lena.

O le faamatalaga foi na fai i le Tamaitai Pule ma le Sui Pule o lo o i ai, ma le aufaigaluega atoa, e tasi lava le mea e vaai mai ai, ma faatusatusa ai le tatou galuega lea e fai e tagata lautele. Po o a lava mea lelei e tatou te faia, ae a le maua ia le tusaga i le tausaga, ia pau lena o le mea e charge mai ai le tatou Matagaluega, e le gata i le vaai mai fafo, o le maua o le lafoga.

E sao le saunoaga a... o le tausaga lea o le a amata nei ia Iulai, ua \$475 miliona lea ua pau mai i lalo ua 10% ua aveese ua faapau ai le tupe na tuu e ao i le tausaga lenei faaletupe i le tausaga fou ona o le mafuaaga lea o le Koviti. Ia, ma le tele o faamama avega lea ua avatu, e le toe maua tiute o le tele o oloa. Faaopoopo mai le leai o ni lafoga a lea Matagaluega, o ia mea, o tupe uma mea na ua le mafai ona toe ao e le Matagaluega. O lea la ua faaititia ai i le 10%, ae o le lui i le Tamaitai Pule, aua o ia e le iloa i le tausaga fou pe toe sau, sue ia maua ia le... ia sili atu le tupe lea na aoina i le tausaga lenei e \$527, i lo o... ia maua i le tausaga fou. Ia sili atu i lo le \$475.

O le faamoemoega foi lena o le amata o le TIMS ia Iulai, ona e i ai lava ia Kamupani la ua ready. Ia ae a toe tolo, ia e pei ona fai atu e 4 masina. O le taimi umi lava lena e pei ona talosaga ai Kamupani e sui latou... e mafai ona sui, e fai mai e 120 aso. O le Kamupani umi lava lena o le taimi, e sui ai latou... o lona uiga e 3 masina. Ae ana talanoa mai ia Mati, i le taimi na amata ai, o le taimi lenei ua uma ona sui. A ua faatalitali lava seia oo ia Iuni, toe tasi le masina, faatoa talanoa mai. Ona o le tele o matou Tulafono ma mea e fai, e matou te faalagolago tele i le aufaipisinisi i a latou fautuaga e aumai e tolo, matou toloa. Toe tuu atu i luma, lea e amata ai lea system ma lea system.

Ae pau lenei o le system ua le mafai ona taofi loa. Fai le mea ua manatu ai le Matagaluega, ona e vaai i le manuia lautele o le atunuu. Vaai i le aoina o le lafoga ina ia mafai ona maua. Aua a toe tolo, e tutusa lava Iulai ma le tolo ia Oketopa. O le vaega muamua, e oo atu lava pe mafai ona toe tolo, ona e pei o le matou tala, e fuafua mai i ai, o le palota po o le a? Fai le mea e tatau ona fai. Aua le fefe, fai le mea e tatau ona fai. Pe e le toe sau ai foi le Minisita, ia ua ou Minisita. Ae e fai le mea e tatau ona fai.

O laisene o pisinisi, faleoloa laiti, ia ma faleoloa foi ia supermarket, i lalo o le Tulafono o Laisene Pisini sa i ai i le 1998, e faatulagaina le aofaiga o le laisene e tatau ona totogi, e faatino ai se pisinisi. I le ituaiga pisinisi structure, ua e resitala ai. Po o le Pisini Tutoatasi, Sole Traders, po o se

pisinisi Kamupani, Company, po o se Pisinisi Faapaaga. Ma o lo o manino le faatinoina o aiaiga o lea Tulafono e ao ai le Tupe Maua, a lo tatou Malo i laisene pisinisi e fua i le ituaiga pisinisi structure o lo o resitala ai.

O le tulaga o lo o faatino ai nei ai le galuega a le NEOC po o le National Emergency Operation Committee, o lo o sui auai le Komesina o Leoleo, ma le Matagaluega o Tiute ma Lafoga. Ia mataitu ia le usitaia o aiaiga o le SOE, SOE o lo o tatou i ai nei. I orders ma o lo o manino ai le eseesega o faleoloa laiti, e faatino atu i le faamalama, ma le faleolo supamaketi, e agai i totonu ma faatino lava lau faatau ma totogi i kesia. E tusa lava pe o oe o le Sole Trader, ae ua e supamaketi ma tatala ou faitotoa e agai i totonu, ia ua e lavea lava i Tulafono o le Supamaketi. Ia ae o faleoloa laiti foi, lea e faatau i faamalama, o le auvaega lena i le taimi nei o le SOE, ia o lo o faaaoga ai ia Tulafono o le SOE, ma o lo o faamalosia e le Matagaluega o Leoleo.

O le Tulafono mo Investment Tax Credit, ua faamuta lona faaaogaina i le 2018. O le fesoasoani lea a le Matagaluega ma le Malo, sa ave i faletalimalo. Na amata mai i le 2003 ona faatino le Tax Credit lea. E tusa a fai se hotel a se isi kamupani, ae e mafai ona aumai tupe a le isi kamupani e invest ai i totonu i i. A faapea la e miliona le invest a le isi kamupani lea e omai fau ai le isi kamupani, e miliona foi lena e let go e le lafoga, e aveese mai i lafoga o tupe maua, i le tausaga.

Selau ma ona tupu miliona le tupe lea ua faamatuu atu e le Matagaluega mo le Tax Credit. O se tupe tele, ma ana maua mai na tupe, oka se tupe e mafai ona ao e le Matagaluega. Ua 70 ma ona tupu miliona le tupe ua faaaoga, ia ae toe 60 ma ona tupu la e totoe. Ma o le tausaga lea e 2018 na aveese mai ai, ona o le taimi sa i ai, sa leai se taimi e uma ai. Sa tuu saunoa, po o le a le umi e fai ai e faaauau lava. Ae o lea la ua faagata nei i le 2018, 5 tausaga na ma tuu i ai ma le Afioga i le Minisita o Tupe e faaaoga ai ia latou Tax Credit nei, a oo atu i le 2023 i le vaiaso muamua o Iulai e le i uma ona faaaoga, ia ona toe foi mai lea. E tatau la ona faaaoga, ae e le i oo i le aso 1 o Iulai i le 2023. Ma ua faagata foi ona toe invest mai nisi, ua taofi, ua caput ona o le tele o tupe ua alu i ai. O fea la lea e alu i ai? O hotels, o hotels lea e alu i ai. O le tele o le fesoasoani a le Malo e avatu i lea foi auaunaga ona o le aoga sa i ai i le tele o hotel manaomia ni potu, ae paga lea ua soosoo mai le misela ma le Koviti-19 ua faaletonu ai lea industry, ae ia au le faamoemoega, e toe agai ai i luma ia le tulaga lea i le turisi.

**FOFOGA FETALAI:** Malie le Minisita se i tulai mai le sui usufono mo Vaimauga Sasae.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, ona sa taua i lau lauga le tulaga lea ua malele i ai Afioga i le Minisita mo le faasaoina o le taimi. O le agaga faafetai, faafetai lava i le Afioga i le Minisita, e pei lava ona ou fai atu, e ese lou alofa i lau Matagaluega ma lou

tuualalo. O lea ua e faia se Tulafono ina ia faagata le vaega o le tax credit lea, o lou lea agaga faafetai lea. Leaga o lea ua e saunoa fai mai o le a faagata i i, o le uiga la o lau fesili, a faapea la e faagata o la e toe \$1 miliona le tax credit la e totroe i lau Matagaluega, po o fea o le a faatino ai lea tulaga? Po o le mea aua leaga e pei o le tulaga lena e sao lelei lava lau saunoaga, o le tele...

E pei ona taua nisi... e lelei atinae ia ua fai ua faamatuu atu faletalimalo a o lea tatou te silasila lava... o le agaga o lou sui usufono, po o totogi lelei lafoga? aua o lea e omai e ese le matafaioi na omai e fai mo mea o telefoni, a o lea ua uma ane ua tutu hotels. Mai fea tupe ia e faatino ai? A faapea o lelei le totogi lafoga, lelei, e faatino ai foi ia atinae. A o le agaga lena o lea sa tuualalo atu ai.

O le tulaga i le pisinisi laisene, o la e mafatia si ou itumalo. E i ai lava nai faleoloa o nai toeaiina, ua faaaoga lava lona ia lava fale e ulufale atu ai i totonu, si faleoloa laitiiti lava, masalo pe a value pe na o se \$1,500 le value o le stock la e i totonu. Ia ona fai lava lea o le... e nofo mai lava i totonu si olomatua e o atu i totonu tagata ona aumai lea. A ua avatu nei le Tulafono fou lea, ua toe omai i le sui usufono pe i ai ni taga sima se i toe pupuni mea ia. E pei o le agaga lena sa tuuina atu ai, o lea e malamalamava supamaketi lea e i ai, a o nai tatou faleoloa tua foi lea e nofo lava si olomatua i totonu e alu atu, o le a le mea e aumai, tapa atu i tua a ua toe tagofia ai tulaga lea. E pei o le agaga tonu lena o lea sa avatu ai, se i silasila ia lau Matagaluega a o e faatino mea ia, faaali ifo le laisene, aua foi ne i avea le tatou Tulafono lea, ma mea o le a toe avatu ai se isi avega i tagata e toe fau ai nisi fale e toe tapunipuni ai le tulaga lea. E pei o le agaga lena o lea sa avatu ai, ae o lau saunoaga i lenei taeao i lenei itula o le aso, ia ua malamalamava foi le sui usufono. O le mea lena sa popole ai, faafetai ua taatia le tulaga lea i le tax credit lea, leaga e tele ia o le tupe, ae o lea lava e taaalo ai latou nei. Ia ma le agaga faafetai.

**FOFOGA FETALAI:** Tulai mai le Minisita.

**Afioga Hon TIALAVEA FEA LENIUTIONISIO HUNT:** O le saunoga po o fea e ave i ai le tupe totoe? E cancel, e aveese e le toe faaaogaina. E pei ona fai atu afai e miliona ae avatu lau lafoga, lau financial statement i le faaiuga o le tausaga e e polofiti, e totogi lau \$500,000 e less mai le \$500,000 mai le tax credit lea e ia oe. O lona uiga o le faiga lea e faaaoga ai. A oo atu la ia Iulai 2023, ia ua cancel e le toe faia, e le mafai ona e toe claim ina se tax credit ua aveese.

Ia e pei o le... ao le tulaga i le faleoloa laitiiti, ia e pei ona faamalamalama atu, o le NEOC e tatau ona fesili ona o latou e ona le Tulafono lea e faamamalu e le Ofisa o Leoleo. Ia ae talanoa i le Ofisa o Leoleo.

E i ai nisi sa afea le Tulafono, i le tulaga i faletalimalo o Le Lava Hotel. E pei ona saunoa le Afioga i le Palemia i le aso ananafi ua maea le aoga o lea Tulafono ma ua tapuni i le 2018. O lo o faaauau pea galuega a le Matagaluega, e mataitu pisinisi ma tupe maua a nei kamupani e lua, ina ia manino ma sao le usitaia o Tulafono o Tiute aemaise le totogiina o lafoga ma tiute o nei Kamupani e lua.

Mo le silafia, o le Investment Tax Credit o lo o qualify ai le Digicel Samoa Ltd e avea ma tax credit mai lana lafoga i tupe maua, income tax ae o lo o totogi pea ia ana VAGST. O la e lava e totogi ia vagst a le kamupani lea. Ia o le Le Lava Hotel lea ua amata ona tatalaina i lenei tausaga ma e o le tupe o le a maua mai e le Matagaluega o lafoga a le aufaigaluega, o lafoga o tupe mama o le hotel, o tupe na o le a mafai ona ao mai e le Matagaluega, e maua mai e tusa ma le tax credit e faaaoga.

O le lafoga o le Capital Gains, ia e pei ona saunoa manino ia le Afioga i le Minisita o le MCIT, e leai se capital gain na maua e le Bluesky Samoa Ltd aua e leai se fefaatauaiga o ni shares i le va o le Bluesky ma le Vodafone, aua o le kamupani lava e tasi e ona ina ia kamupani e lua, ae na ona suiga lava o le management structure, ina ia faaaoga ai le igoa ma le polokalame a le Vodafone. O lea e leai foi se lafoga po o se capital gain tax e maua mai ai. Ae o le a mataituna pea e le Matagaluega o Tupe Maua ia tupe faaalu a lenei kamupani, ina ia mautinoaina pea le tuuina mai o latou faamatalaga tau lafoga. O lo o usitaia pea aiaiga tau Tulafono, ia sao ma manino lafoga e totogiina mai i le Malo.

Ia o le faauma atu ina lena o le...

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, sina avanoa lava leaga o lea foi sa taua e le sui usufono lenei ia le... na ou fai atu e pei o le tele lava o tuualalo, ona ou te alofa i le Minisita. I le suega o tupe ia na ou tuualalo ai ina ia maua uma tupe ia. O lea la ua taua le tulaga lea e leai se tupe o maua i le tatou faatauina lea o le Bluesky, ia o le mea lena e tatau ona manino i le Maota lenei leaga o lea foi na i ai nisi o sui usufono sa taua faapea e \$11 miliona ae toe faatau atu i isi i le \$86 miliona Amerika.

**Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai o le a ou tautala i ai i le mataupu lea pe a oo mai, ae ua uma lou taimi.

**FOFOGA FETALAI:** Ia, ua maua mai e le sui usufono, ae se i saunoa i ai le Palemia.

**Afioga Sulamanaia Fetaiai Tauiliili Tuivasa:** Leaga o lea e le i uma atu lata...

**FOFOGA FETALAI:** O lea ua maua atoa, na ona amata lava maua e le Palemia le taunuuga o lou finagalo. Ia se i tulai mai le Minisita o Tupe.

**Afioga Hon Sili Epa Tuioti (Minisita o Tupe):** Ia lau Afioga i le Fofoga Fetalai, na o sina taimi puupuu lava e fesoasoani atu ai ma faamalamalama nisi o vaega ia sa taua lea sa saunoa i ai le Minisita o Tupe Maua. O le tulaga lava lea i mea o kamupani ia e faalogotata i ai le kamupani lea e faia le olioli ma tulaga faapena, ua tele ina tuu avanoa i ai tatou, ae e tatau ona matua faamalosia a tatou Tulafono. E le faapea foi a toe tuu atu i ai le avanoa lenei, e toe tupu mai loa, e tatau ona tapuni.

Silasila foi le mamalu o le Palemene, i mea nei o alcohol, ma mea faapena, ua le gata ina mamai ai o tatou tagata, tutupu ai faalavelave, femisaai, ua ave i le falepuipui. Tele le social problems ua tutupu mai i nei mea o tatou fagu malosi lenei. E tatau ona tatou puipui i tagata talavou o le tatou atunuu.

E moi e lelei le tupe, ae e tatau foi ona fuafua e tatou, ina ia faapena ona saogalemu...

**Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai, masalo lafo mai le mataupu lea o le a tagofia e le Kapaneta.

**FOFOGA FETALAI:** Malo, ia lafo atu i le Kapaneta se i tautuana ma outou faiva.... se o le taunu lenei e maua loa si mea e ona ai, e ona nei, ona taeao, tala atu taeao emo ane le ata ua toa fia selau ua feoti i lenei mea. Ia se i silasila i ai le Kapaneta.

Ia faaiu mai le saunoaga a lau Afioga i le Minisita.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, ia o le mea la lenei o le faauma atu lena o mataupu sa laga mai, ia ae o sina au faamatalaga laitiiti i lo matou... o lea e lava le taimi. Ia i le matou fesagaiga ma Matagaluega ia e 2, o Leoleo ma le Matagaluega o... Ia e talosagaina pea le tatou galulue aua le manuia lautele o le atunuu, ona o le Matagaluega o Tiute ma Tupe Maua, e sueina le tupe ina ia mafai ona maua le nofo lelei, maua le tamaoaiga o le atunuu ina ia mafai ona faasoa atu i le Minisita o Tupe. Ia o mea uma foi e fai e le Matagaluega ma le.... o so o se ituaiga mea e maua ai le auala o le tupe, ia e faatino lava e le Matagaluega.

Ia o le Matagaluega o Leoleo o lo o nafa ma le puipuia o le saogalemu o le mamalu lautele, ia aemaise foi le vaaia o tatou uso pagota o lo o i le toesi i Tanumalala, ia e manaomia le galulue faatasi, aua le manuia o le tatou atunuu atoa ma le filemu.

Lau Afioga se i fai sina faamatalaga i si ou itumalo, leaga toe pau lenei o le Tala o le Tupe e lavea nei vagana ai le Supplementary ia Tesema. Ia si ou itumalo i le Vaa o Fonoti, le falelua i Fagaloa ma Faleapuna, o lenei o le a atoa le 10 tausaga o ou tauaveina le tofi. E momoli atu ai le faafetai i le faaeaea na outou toina mai ia te au i lenei 10 tausaga pe a aulia atu le tausaga fou. O le a se galue, ia ni galuega na fai, ia e pau o le mea ua oo i ai le mafai a le tagata. O nisi galuega faamoemoe i le Atua e faataunuina. Ae momoli atu le agaga faafetai i la outou tapuaiga, aemaise Susuga i Faafeagaiga ma Patele ma e uma o lo o i totonus o le itumalo, aemaise le toeaina Faatonu o lo oi Uafato. Faafetai le tapuai, faafetai foi fautua i le tele o mea na fai, o a lava ni mea o totoe i lenei Nofoaiga, ia o le a taumafai e faatino uma.

Ae ona o le tulaga o Tulafono, ma vaevaeina o itumalo faapalota, ou te iloaina ua le mafai ona toe tauva i le itumalo o Vaa o Fonoti, ona o lea ua vavae mai Faleapuna i le itumalo o Anoamaa i Sasae. Ia e paga lea, e lagona foi ia le vaivai o le loto, ia aemaise o le o lo o tu i le foe, ia o le uso tuofe. E le o se... o le uso tuofe. E faigata lena o le mea ua oo i ai le... ona o le Tulafono.

Ia e talitonu e faiaso pea le Atua, i le uso sui usufono, ona e le mafai foi ona ou alo ese au mai le manaoga o lou aiga ou te sau ou te sau pea ou te alu i le Suafa Tialavea i Faleapuna. Ia o lona uiga o le palota la i luma o le a ou tauva ai i le Anoamaa i Sasae, ona i le taimi nei i le Tulafono, o lea ua Anoamaa i Sasae Faleapuna. Ae ona e faatoa mafai ona faatino i le Palota o le a sosoo mai. Ia ou te faaali atu ai i le itumalo, ona o le a ou alu ese, ia ae o a ni galuega o le a mafai ona faatino i lenei taimi, o le a faatino atu.

Ia ae tatalo mai foi, ia po o ai le sui o le a suia au i le itumalo i le palota o le a sosoo ai nei, ia tuu i le Atua e na te faasoasoaina mai. O ai lava i lenei mea e tatou te vevesi ai i le palota, ia o le Atua lava e na te faasoa, pe a faapea e talitonu le tagata i tofiga mai i le Atua, o le a lava le iuga? O le tofiga na mai i le Atua. Ia ae o lenei aso ma le... ia faafetai atu i le tou lagolagoina o au i le 10 tausaga ua tuanai.

Ia le itumalo foi o le a tauva i ai, ia e taaalo lava tama o le auuso, e tele aiga. O aiga o Alaiasa o aiga o au. Lufilufi, Faleapuna, Falefa, toto, tino, aano. Ia ae paga lea o le Tulafono a le Minisita o Palota lea ua faapenei ai, o le alii lea. Ana lelei le alii lea e le...

Ia, e pei o se tala atu lena i le itumalo. Alofagia e le Atua lau Afioga i le Fofoga Fetalai, maua le malosi ina ia mafai ona e toe tu mai i le isi palota o lo o sosoo. Lau Afioga i le Palemia, ia maua pea le malosi ma le onosai e faafoefoe ai lo tatou Malo. O lenei lava vaitau o le agai atu i le palota, na o faafitauli mea tatou te fetaiai. Ia, a o le toa lava o le tai ma tatou galulue.

Lau Afioga i le Sui Palemia, faamalo i lau Afioga le faufautua i le Afioga i le Palemia i le lua vaa seelua i le faatautaiga o le tatou Malo aemaise foi le tatou Vaega Faaupufai. Uso a Kapaneta, ia maua le malosi e faatino ai tiute o totoe o lenei tausaga. Minisita Lagolago, e tele le tou faufautua foi ia i

matou, aemaise foi Taitaifono o Komiti ma Komiti taitasi o le la itu, ia alofagia e le Atua le palota ia tatou toe omai uma. Ae manuia lenei aso i lau Afioga i le Fofoga Fetalai, aua foi o lea ua uma le taimi.

**FOFOGA FETALAI:** Malo faafetai. Ia, manaia ua manino mea uma i le faafofoga a le Palemene aemaise foi o le faafofoga tapuai mai a Samoa i le taumafai mai a lau Afioga i le Minisita mo Tupe Maua, Leoleo ma Falepuipui e faamalamalama ma faamanino mea sa laga e sui usufono mamalu. Malo faafetai e pei lava o le upu e fai i Atua. Ia, ua taliga foi e fia faalogologo aua le faamoemoe mo le itumalo, ia faamoemoe i le Atua, e faapena, e taaalo lava tama a o le uso. O ai lava e valaaufina e le Atua, ia o lena e tulai mai e tauave le itumalo.

Ae ona o lea ua tatou toai taunu i le itula e faamuta ai le tatou galuega, ia o le a faapena ona fai, ua manatu ua vela foi le fala. Ae tatou te le i tolopo ma faaiu le tatou Fono, o le a ou faaiuina le tatou Fonotaga i se tatalo puupuu.

*Na tolopo Galuega a le Fono Aoao Faitulafono i le itula e 12:58 i le aoauli seja aulia le itula e 9:00 i le taeao o le Aso Tofi, 25 Iuni 2020.*